



11

刀保士
5143
24-13



門保
號 5143
卷 24-19

唐會要卷七十六



宋王 撰

貢舉中

進士

貞觀八年三月三日詔進士試讀一部經史

二十二年九月考功員外郎王師旦知舉時進士張昌齡王公瑾並有俊才聲振京邑而師旦考其文策全下舉朝不知所以及奏等第太宗怪無昌齡等名因召師旦問之對曰此輩誠有文章然其體性輕薄文章浮豔

唐會要 卷之十一
必不成令器臣若擢之恐後生相效有變陛下風雅帝
以爲名言後並如其言

調露二年四月劉思立除考功員外郎先時進士但試
策而已思立以其庸淺奏請帖經及試雜文自後因以
爲常式

開元二十四年十月禮部侍郎姚奕請進士帖左氏傳
周禮儀禮通五與及第

乾元初中書舍人李揆兼禮部侍郎揆嘗以主司取士
多不考實徒峻其隄防索其書策殊不知藝不至者居

文史之囿亦不能摘其詞藻深昧求賢意也及其試進
士文章日於中庭設五經及各史及切韻本於牀而引
貢士謂之曰國家進士但務得才經籍在此各務尋檢
由是數日之間美聲上聞

建中二年十月中書舍人權知禮部貢舉趙贊奏進士
先時試詩賦各一篇時務策五道明經策三道今請以
箴論表贊代詩賦仍試策二道

三年四月勅禮部應進士舉人等自今已後如有試官
及不合選并諸色出身人等有應舉者先于舉司陳狀

唐會要 卷之六 二
准例考試如才堪及第者送名中書門下重加攷覈如實才堪卽令所司追納告身注毀官甲准例與及第至選日仍稍優與處分其正員官不在舉限

元和二年十二月勅自今已後州府所送進士如跡涉疏狂兼虧禮教或曾任州府小吏有一事不合清流者雖薄有辭藝並不得申送如後舉事發長吏奏停現任如已停替者殿二年本試官及司功官見任及已停替並量事輕重貶降仍委御史臺常加察訪
長慶元年勅今年禮部侍郎錢徽下進士鄭郎等一十

四人宜令中書舍人王起主客郎中知制誥白居易重試覆落十三人三月丁未詔國家設文學之科本求實才苟容僥倖則異至公訪聞近日浮薄之徒扇爲朋黨謂之關節干擾主司每歲策名無不先定眷言敗俗深用興懷鄭郎等昨令重試乃求深僻題目貴觀學藝淺深孤竹管是祭天之樂出于周禮正經閱其呈試之文都不知其本事辭律鄙淺蕪累至多其溫業等三人粗通可與及第其餘落下今後禮部舉人宜准開元二十五年勅及第人所試雜文先送中書門下詳覆侍郎錢

徽貶江州刺史

三年正月禮部侍郎王起奏曰伏以禮部放榜已是成名中書重覆尙未及第重覆之中萬一不定則放榜之後遠近誤傳其于事理實爲非便臣伏請今年進士堪及第者本司攷試訖其詩賦先送中書門下詳覆候勅卻下本司然後准舊例大字放榜從之

太和七年八月禮部奏進士舉人先試帖經并略問大義取經義精通者次試議論各一首文理高者便與及第其所試詩賦並停者伏請帖大小經各十帖通五通

六爲及格所問大義便與習大經內准格明經例問十條仍對眾口義伏准新制進士略問大義緣初釐革今且以通三通四爲格明年以後並依明經例其所試議論請限五百字以上爲式勅旨依奏

八年正月中書門下奏進士放榜舊例禮部侍郎皆將及第人名先呈宰相然後放榜伏以委任有司固當精慎宰相先知取舍事匪至公今年以後請便令放榜不用先呈人名其及第人所試雜文及鄉貫三代名諱並當日送中書門下便合定例勅旨依奏

其年十月禮部奏進士舉人自國初以來試詩賦帖經時務策五道中間或變更旋卽仍舊蓋以成格可守所取得人故也去年八月勅節文先試帖經口義議論等以臣商量取其折衷伏請先試帖經通數依新格處分勅旨依奏

九年十二月中書門下奏今月九日閣內面奉進止令條流進士人數及減下諸色入仕人等准太和四年格及第不得過二十五人今請加至四十人明經准太和八年正月勅及第不得過一百一十人今請再減下十

人

開成元年二年三年並高鐸知貢舉每年皆恩賜題目及第並四十人

其年十月中書門下奏朝廷設文學之科以求髦俊臺閣清選莫不由茲近緣覈實不在于鄉閭趨名頗雜于非類致有跋扈之地情計交通將澄化源在舉明憲臣等商量今日以後舉人于禮部納家狀後望依前五人自相保其衣冠則以親姻故舊久同遊處者其江湖之士則以封壤接近素所諳知者爲保如有缺孝弟之行

資朋黨之勢跡由邪徑言涉多端者並不在就試之限如容情故自相隱蔽有人糾舉其同舉人並三年不得赴舉仍委禮部明爲戒勵編入舉格勅依奏

會昌三年正月勅禮部所放進士及第人數自今後但據才堪卽與不要限人數每年止于二十五人

四年二月權知貢舉左僕射太常卿王起放及第二十五人續奏五人堪放及第楊質至竇緘楊巖鄭朴源重奉勅祇放楊巖及第餘並落下

五年二月諫議大夫權知貢舉陳商放及第三十七人

其年三月勅戶部侍郎翰林學士白敏中重試覆落七人

其月中書門下奏貢舉人並不許于兩府取解仰於兩都國子監就試

大中元年正月禮部侍郎魏扶放及第二十三人續奏堪放及第二人封彥卿崔琢鄭延休等皆以文藝爲眾所知其父皆在重任不敢選其所試詩賦封進奏進止令翰林學士戶部侍郎知制誥韋琮等考盡合程度其月二十五日奉進止並付所司放及第有司考試祇

合在公如涉徇私自自典刑從今已後但依常例取舍不得別有奏聞

其年六月中書門下奏貢舉人取解宜准舊例于京兆河南府集試從之

二年正月中書門下奏從貞元元年太和九年秋冬前皆是及第便從諸侯府奏試官充從事兼史館集賢宏文諸司諸使奏官充職以此取人常多得士由是長不乏材用太和會昌末中選後四選諸道方得奏充州縣官職如未合選並不在申奏限臣等昨已奏論面奉進

止自今已後及第後第三年卽任奏請勅旨依奏

天祐三年三月勅今年吏部所放進士依去年人數外更放兩人

緣舉雜錄

長壽二年十月左拾遺劉承慶上疏曰伏見比年以來天下諸州所貢物至元日皆陳在御前唯貢人獨於朝堂拜列但孝廉秀異旣充歲貢宜列王庭豈得金帛羽毛升於玉階之下賢良文學棄彼金門之外恐所謂貴財而賤義重物而輕人伏請貢人至元日引見列在方

物之前以備充庭之禮制曰可

開元五年九月詔諸州鄉貢明經進士見訖宜令引就國子監謁先師學官爲之開講質問疑義仍令所司優厚設食兩館及監內得解舉人亦准此其日清官五品已上及朝集使並往觀禮卽爲常式

謁先師自此始也

十九年六月勅諸州貢舉皆於本貫籍分信明者然依例不得於所附貫便求申送如有此色所由州縣卽便催科不得遞相容許

二十四年九月二十日禮部以貢舉請別置印

天寶十二載七月十三日詔天下舉人不得充鄉賦皆須補國子學士及郡縣學生然後聽舉至至德元年已後依前鄉貢永泰元年七月以京師米貴遂分兩京集舉人至大曆十年五月十九日勅今年諸色舉人悉赴上都准舊例十月二十五日隨考試戶部著到興元元年中書省有柳樹建中末枯至是再榮人謂之瑞柳禮部侍郎呂渭試進士以瑞柳爲題上聞而惡之貞元七年兵部侍郎陸贄權知貢舉時崔元翰梁肅文藝冠時贄輸心於肅與元翰推薦藝實之士升第之日

雖眾望不愜然一歲選士纔十四五數年之內居臺省者十餘人

十六年十二月勅禮部別頭舉人宜委禮部考試不須置別頭

十八年五月勅明經進士自今已後每年考試所拔人明經不得過一百人進士不得過二十人如無其人不必要補此數

十九年勅禮部舉人自春以來久憊時雨念其旅食京邑資用屢空其禮部舉人今年宜權停

元和十三年十月權知禮部侍郎庾承宣奏臣有親屬應明經進士舉者請准舊例送考功試從之自貞元十六年高郢掌貢舉請權停考功別試識者是之自今始復

太和元年二月勅自今已後天下勳臣節將子弟有能修詞尚學應進士明經及通史學者委有司務加獎引其年七月勅今年宜權於東都置舉其明經進士便在東都赴集其上都國子監舉人等合在上都試及節目未盡者條流奏聞

八年正月禮部侍郎李漢奏准太和七年八月勅貢舉人不要試詩賦策且先帖大經小經共二十帖次對正義十道次試議論各一首訖考覈放及第其月勅吏部禮部兵部今年選近緣秋末蟲旱相因恐致災荒權令停罷及斂藏之後物力且任念彼求名之人必懷觖望之志寧違我令以慰其心宜依常例卻置應緣所納文狀及銓試等期限仍准今年格文遞延一月
大中元年正月勅自今放進士榜後杏園任依舊宴集所司不得禁制先是武宗好遊巡曲江亭禁人宴聚故

也

十年四月禮部侍郎鄭顥進諸家科目記十三卷勅付翰林自今放榜後仰寫及第姓名及所試詩賦題目進入內仍付所司逐年編次
咸通十一年四月勅去年屬以用軍之際權停貢舉一年今既偃戈卻宜仍舊來年宜別許三十人及第進士十人明經進士二十人已後不得援例

制科舉

顯慶三年二月志烈秋霜科韓思彥及策

乾封元年幽素科蘇瓌解琬苗神客格輔元徐昭劉訥
言崔谷神及第

上元三年正月辭殫文律科崔融及第

永隆元年岳牧舉武陟縣尉員半千及第上御武成殿
親問曰兵書云天陣地陣人陣各何謂也半千對曰臣
觀載籍多謂天陣謂星辰孤虛也地陣謂山川向背也
人陣謂偏伍彌縫也以臣愚見謂不然矣夫師出以義
有若時雨得天之時此天陣也兵在足食且耕且戰得
地之利此地陣也士卒輕利將帥和睦此人陣也若有

兵者使三者去矣其何以戰上深賞之下異善孫王姓
垂拱四年十二月辭標文苑科房晉皇甫瓊王旦及第
永昌元年正月蓄文藻之思科彭景直及第抱儒素之
業科李文愿及第

長壽三年四月臨難不顧徇節密邦科薛稷寇泚及第
證聖元年長才廣度沈迹下僚科張漪及第
萬歲通天元年文藝優長科韓璘及第

神功元年九月絕倫科蘇頲崔元童袁仁敬何鳳孟兼
禮洪子輿盧從愿趙不欺及第

大足元年理選使孟詵試拔萃科崔翹鄭少微及第疾
惡科馮萬石及第

長安二年龔黃科馮克麾及第

神龍二年才膺管樂科張大求魏啟心魏愔盧絢張文
成褚璆成廩業郭璘趙不爲及第才高位下科馮萬石
晁良貞張敬及第

二年才堪經邦科張九齡康元瓌及第賢良方正科蘇
晉宋務光寇泚盧怡呂恂及第
景龍二年抱器懷能科夏侯銛及第茂才異等科王敬

從盧重元及第

景雲三年文以經國科袁暉韓朝宗及第藏名負俗科
李俊之及第

先天二年文經邦國科韓休及第藻思清華科趙冬曦
及第寄以宣風則能興化變俗科郭璘之及第道侔伊
呂科張九齡及第手筆俊拔超越流輩科杜昱張子漸
張秀明常無咎趙居正賈登邢巨及第

開元元年直言極諫科梁昇卿袁楚客及第哲人奇士
逸倫屠釣科孫逖及第良才異等科邵潤之崔翹及第

五年文儒異等科崔侃褚庭誨及第文史兼優科李昇期康子元達奚珣及第

六年博學通藝科鄭少微蕭識及第

七年文辭雅麗科邢巨苗晉卿褚思光趙良器及第

十二年將帥科裴敦復房自謙及第

十五年武足安邊科鄭防樊衡及第高才沈淪草澤自舉科鄧景山及第

十七年才高未達沈迹下僚科吳鞏及第

十九年博學宏詞科鄭昉陶翰及第

二十一年多才科李史魚及第

二十三年王伯科劉璀杜綰及第智謀將帥科張重光

崔圓李廣琛及第

天寶元年文辭秀逸科崔明允顏真卿及第

六載風雅古調科薛璩及第

十三載二月辭藻宏麗科楊綰及第

大曆二年樂道安貧科楊膺及第

六年諷諫主文科鄭珣瑜李益及第

建中元年賢良方正能直言極諫科姜公輔元友直樊

澤呂元膺及第文辭清麗科奚涉梁肅劉公亮鄭轅沈封吳通元及第經學優深科孫玘黎逢白季隨及第高蹈邱園科張紳衛良儒蘇哲及第軍謀越眾科夏侯審平知和鄭儋凌正周渭丁悅及第孝弟力田聞于鄉閭科郭黃中崔浩李牧及第

貞元元年九月賢良方正能直言極諫科韋執誼鄭利用穆質楊邵裴復柳公綽歸登李直方崔邠鄭敬魏宏簡沈迴田元祐徐袞及第博通墳典達于教化科熊執易劉簡甫及第識洞韜略堪任將相科許贄及第

四年四月賢良方正能直言極諫科崔元翰裴次元李彝崔農史牟陸震柳公綽趙參徐宏毅韋彭壽鄒儒立王及杜倫元易王眞及第清廉守節政術可稱堪縣令科李巽及第孝弟力田聞于鄉閭科張皓及第十年十二月賢良方正能直言極諫科裴珣王播朱諫裴度熊執易許堯佐徐宏毅杜穀崔羣皇甫鎛王仲舒許季同仲子陵鄭士林邱穎及第博通墳典通于教化科朱穎及第詳明政術可以理人科張平叔李景亮及第

元和元年四月才識兼茂明于體用科元禎韋惇獨孤
郁白居易曹景伯韋慶復崔綰羅讓崔護薛存慶韋珩
李瑀元修沈傳師蕭俛柴宿及第達于吏治可使從政
科陳祐及第

二年四月賢良方正能直言極諫科牛僧孺皇甫湜李
宗閔李正封吉安宗徐晦賈餗王起郭球姚袞庾威及
第博通墳典達于教化科馮苞陸亘及第軍謀宏達材
任將帥科樊宗師及第達于吏治可使從政科蕭睦及
第

長慶元年十二月賢良方正能直言極諫科龐嚴任畹
呂述姚中立韋曙李回崔嘏崔龜從韋正貫崔知白陳
元錫及第詳明政術可以理人科崔郢及第軍謀宏達
材任將帥科吳思李商卿及第博通墳典達于教化科
李思元及第
寶曆元年四月賢良方正能直言極諫科唐紳楊儉韋
瑞符舒元褒蕭敞楊魯士來擇趙祝裴暉韋繇李昌寶
嚴楚封李涯蕭夷中馮球元晦及第詳明吏治達于教
化科韋正貫及第軍謀宏達材任邊將科裴儔侯雲章

及第

太和二年閏三月賢良方正能直言極諫科李邵裴休
裴素南卓李甘杜牧馬植鄭亞崔博崔興王式羅邵京
崔湊韓賓崔慎由苗愔韋昶崔煥崔讜及第詳明吏理
達于教化科宋昆及第軍謀宏達堪任將帥科鄭冠李
式及第

載初元年二月十四日試貢舉人于洛成殿前數日方
畢殿前試人自茲始也
天授三年左補闕薛謙光上疏曰國以得賢爲寶臣以

貢士爲忠是以子皮之讓國僑鮑叔之推管仲燕昭委
兵于樂毅符堅託政于王猛此由識士之深也若宰我
見愚于仲尼逢萌被知于文叔韓信無聞于項氏毛遂
不齒于平原此失士之故也何者比來薦舉多不以才
假譽馳聲互相推獎希潤身之小計忘臣子之大猷非
所以契國求賢副陛下翹翹之望也古之取士有異于
今先觀名行之源考其鄉邑之譽崇禮讓以勵己揚信
義以標信以敦材爲先最以雕蟲爲後科故人崇勸讓
之風俗去輕浮之行希古者必修確然不拔之操行難

進易退之規眾議已定其高下郡將難誣于曲直故計
貢賢愚卽州將之榮辱穢行彰露亦鄉人之厚顏是以
李陵降而隴西慙段干隱而西河美故名勝于利則小
人之道銷利勝于名則貪暴之風扇是知化俗之本須
擯輕浮昔冀缺以蹈禮升朝則晉人知禮文翁以儒林
獎俗則蜀士從儒未有上之所好而下不從其化者也
自七國之季雖雜縱橫而漢世求才猶徵百行是以禮
節之士道德自修里閭推高然後爲府寺所辟魏氏取
人尤愛放達晉宋之後祇重門資獎爲人求官之風乖

授職推賢之義有梁薦士雅愛屬辭陳氏簡賢特珍賦
詠故其以詩酒爲重不以修身爲務逮至隋室餘風尙
存開皇中李諤論之于文帝曰魏之三祖更好文辭世
俗以此相高朝廷以茲擢士故文章日煩其政日亂帝
納李諤之策由是下制禁斷文筆浮辭其年泗州刺史
司馬幼之以表不典實得罪于是風俗改勵政化大行
煬帝嗣興又變前法置進士等科于是後生之徒復相
倣效緝綴小文名之策學不以指實爲本而以虛浮爲
貴有唐纂厯雖改革于前非陛下君臨思察才于共治

樹本崇化唯在旌賢今之舉人有乖事實議行決小人
之筆行修無長者之論策第喧競于州府祈恩不勝於
拜伏或明制纔出試遣搜敷馳驅府寺之門出入王公
之第察其行而度其才則人品于茲見矣徇已之心切
則至公之理乖貪仕之性彰則廉潔之風薄是知府命
雖高異叔度勤勤之讓黃門已貴無秦嘉耿耿之辭縱
不能抑已推賢亦不肯待于三命祇如才應經邦之流
唯令試策武能制敵之列祇驗彎弧若其文擅清奇便
充甲第藻思微減旋即告歸以此收人恐乖事實何者

樂廣假筆于潘岳靈運辭高于穆之平津文劣于長卿
子建筆麗于荀彧若以射策爲最則潘謝買馬必居孫
樂之右若使協贊機猷則安仁靈運亦無裨補之益由
此言之不可一槩取也至如武藝則趙雲雖勇資諸葛
之指揮周勃雖雄乏陳平之計略若使樊噲居蕭何之
任必無指縱之機使蕭何入戲下之軍亦無免主之效
是知謀將不取于弓馬良相不資于射策伏願降明詔
頒峻科斷浮虛之餘辭取實用之良策文則試以効官
武則令其守禦初旣察言觀行終則循名責實謹按漢

唐書 卷一百一十六
法所舉之主終身保任楊雄之坐田儀責其冒薦成子
之居魏相酬于得賢賞罰之令行則請謁之心絕退讓
之義著則貪競之路銷仍請寬立年限容其採訪簡汰
堪用者令其試守以觀能否參驗以別是非不實免王
丹之官得人加翟璜之賞自然舉得真才斯君子之道
長矣

景雲元年十二月制四方選集羣才輻湊操斧伐柯求
之不遠其有能習三經通大義者綜一史知本末者通
三教宗旨究精微者善六經文字辨聲象者博雅曲度
和六律五音者韜略學孫吳識天時人事者暢于辭氣
聰于受領善敷奏吐納者咸令所司博採明試朕親擇
焉

開元八年三月上親策試應制舉人于含元殿謂曰古
有三道今減從一道近無甲科朕將存其上第務收賢
俊仍令有司設食

二十六年正月勅孝弟力田風化之本比來將同舉人
考試辭策今後兩事兼著狀迹殊尤者委所由長官時
以名薦更不須隨考使例申送

天寶十三載十月一日御勤政樓試四科舉人其辭藻
 宏麗問策外更試詩賦各一道制舉試詩賦從此始
 元和三年三月勅制舉人試訖有逼夜納策計不得歸
 者並于光宅寺止宿應巡檢勾當官吏并隨從人等侍
 舉人納策畢並赴保壽寺止宿仍各仰金吾衛使差人
 監引送至宿所如勾當勿令喧雜

其年四月以起居舍人翰林學士王涯為都官員外吏
 部員外郎韋貫之為果州刺史先是策賢良詔楊於陵
 鄭敬李益與貫之同為考官是年牛僧孺皇甫湜李宗
 閔條對甚直無所畏避考官考三策皆在第權倖或惡
 其詆已而不中第者乃註解其策同為唱誨又言涯居
 翰林其甥皇甫湜中選考覈之際不先上言故同坐焉
 居數日貫之再黜巴州司馬涯號州司馬楊於陵遂出
 為廣州節度使裴垍時為翰林學士居中覆視無所同
 異乃為貴倖泣訴情罪于上上不得已罷垍翰林學士
 除戶部侍郎

十五年二月勅先帝所徵賢良方正能直言極諫等科
 目朕不欲親試宜令中書門下尚書省四品已上官就

尚書省同試吏部尚書趙宗儒奏奉勅以先朝所徵制科舉人令與中書門下四品已上官同于尚書省就試者伏以制科所試本在親臨南省策試亦非舊典況今山陵日近公務繁迫待問之士就試非多臣商量且宜停罷從之

太和二年以左散騎常侍馮宿太常少卿賈餗庫部郎中龐嚴爲考策官第二十二人而前進士劉蕡策果切直不居是選其間指陳時事不避貴近言辭激切士林感動雖賈董無以過也而考官有所畏忌不敢上聞隨

例擯斥識者議之物論喧然不平守道正人傳其文至有相對而泣者諫官等或將其策白于宰臣宰臣怯憚亦不敢爲之明白登科人李邵者深有所愧抗表請讓官于蕡事竟不行及天復初劉季述敗起居郎羅衮上疏請追贈蕡於是下詔贈左諫議大夫仍訪子孫敘用初蕡條對制策言宦官權盛後必爲患及是而果然也四年正月德音節文天下諸色人中有賢良方正能直言極諫及經術優深可爲師法詳明吏治達于教化等科委常參官及方牧郡守各舉所知草澤無人舉者亦

聽自舉限來年正月至上都五年正月十七日詔以兵
戈未息權停

大中元年二月吏部宏辭舉人漏洩題目爲御史臺所
劾侍郎裴稔改國子祭酒郎中周敬復罰兩月俸料考
試官刑部郎中唐扶出爲虔州刺史監察御史馮顥罰
一月俸料其登科十人並落下

十二年三月中書舍人李藩知舉放博學宏詞科陳琬
等三人及進詩賦論等召謂藩曰所賦詩中重用字何
如藩曰錢起湘靈鼓瑟詩有重用字乃是庶幾上曰此

詩似不及起乃落下

孝廉舉

貞觀十八年二月六日引汴鄆諸州所舉孝廉賜坐于
御前上問以皇王政術及皇太子問以曾參孝經並不
能答太宗謂曰自楚莊王以羣臣莫逮退而有憂色曰
諸侯能自得師者王自爲謀而莫已若者亡今以不穀
之不德羣臣言莫我逮我國能免于亡乎朕發詔徵天
下俊異纔以淺近問之咸不能答海內賢哲將無其人
耶朕甚憂之

寶應二年六月二十日禮部侍郎楊綰奏請每歲舉人依鄉舉里選察秀才孝廉勅令公卿以下集議中書舍人賈至議曰楊綰所奏實爲正論然衣冠遷徙人多僞寓士居鄉土百無一二今依古制恐取士之道未盡今禮部每歲擢甲乙之科祇足長浮薄之風開僥倖之路矣其國子博士等望加員數十道大郡量置大學館令博士出外兼領郡官召致生徒依乎故事保桑梓者鄉里舉焉在流寓者庠序推焉如此則青青不復興刺擾擾由其歸本焉勅旨每州每歲察孝廉取在鄉閭有孝

弟廉恥之行薦焉委有司以禮待之試其所通之學五經之內精通一經兼能對策達于治體者並量行業授官其明經進士並停道舉亦宜准此況所司作條件處分七月二十六日禮部侍郎楊綰奏貢舉條目曰孝廉各令精通一經其取左氏傳公羊穀梁禮記周禮儀禮毛詩尚書周易任通一經每經問義二十條皆取旁通諸義務窮根本試格策三道問古今治體及當今時務要取堪行用者仍每日問一道頻三日畢經義及策全通爲上第其上第者望付吏部便與官其問義每十條

通七策通二爲中第與出身下者罷之又論語孝經皆
聖人深旨孟子亦儒門之達者其學官望兼習此三者
其爲一經其試如上秀才舉人望令精通五經問義二
十條對策五道全通者爲上第上第者送名中書門下
請超與處分問義十條通七策通四爲中第中第者送
吏部與官下者罷之孝弟力田但能熟讀一經言音典
切卽令所司舉送試通使與出身其今年舉人或舊業
旣成理難速改或遠州所送身已在途事須收獎不可
中廢其今秋舉人中有情願依舊舉業者亦聽今年之

後一依新勅勅旨進士明經置來日久今頓令改業恐
難其人諸色舉人宜與舊法兼行至建中元年六月九
日勅孝廉科宜停

開元禮舉

貞元二年六月十一日勅開元禮國家盛典列聖增修
今則不列學科藏在書府使劾官者昧于郊廟之儀治
家者不達冠婚之義移風固本合正其源自今已後其
諸色舉人中有能習開元禮者舉人同一經例選人不
限選數許習但問大義一百條試策三道全通者超資

唐會要 卷七十六 禮
與官義通七十條策通兩道已上者放及第已下不在
放限其有散官能通者亦依正官例處分至貞元九年
五月二十日勅其習開元禮人問大義一百條試策三
道全通者爲上等大義通八十條已上策兩道已上爲
次等餘一切並准三禮例處分仍永爲常式

元和八年四月吏部奏應開元禮及學究一經登科人
等舊例據等第高下量人才授官近日緣校書正字等
名望稍優但霑科第皆求注擬堅待員闕或至踰年若
無科條恐長僥倖起今已後等第稍高文學兼優者伏

請量注校正其餘習開元禮人太常寺官有闕相當注
通經人國子監官闕相當者並請先授以備講討如不
情願卽通注他官庶名實有名紀律可守其今年以前
待闕人亦請依此條限使爲常制勅旨依奏

三禮舉

貞元九年五月二日勅王者設教勸學攸先生徒肄業
執禮爲本然則禮者務學之本立身之端居安之大猷
致治之要道頃有司定議習禮經者獨授散官頗乖指
要姑務宏獎以廣儒風自今已後諸色人中有習三禮

者前資及出身人依科目例選吏部考試白身人依貢
舉例吏禮部考試每經問大義三十條試策三道所試
大義仍委主司于朝官學官中揀選精通經術三五人
聞奏主司于同試問義策全通爲上等特加超獎大義
每經通二十五條以上策通兩道已上爲次等依資與
官如先是員外試官者聽依正員例其諸館學生願習
三禮及開元禮者並聽仍永爲常式

三傳三史附

長慶二年二月諫議大夫殷侑奏謹按春秋二百四十

二年行事王道之正人倫之紀備矣故先師仲尼稱志
在春秋歷代立學莫不崇尚其教伏以左傳卷軸文字
比禮記多校一倍公羊穀梁與尚書周易多校五倍是
以國朝舊制明經授散若大經中能習一傳卽放冬集
然明經爲傳學者猶十不一二今明經一例冬集人之
常情趨少就易三傳無復學者伏恐周公之微旨仲尼
之新意史官之舊章將墜於地伏請置三傳科以勸學
者左傳問大義五十條公羊穀梁各問大義三十條策
三道義通七以上策通二以上與及第其白身應者請

同五經例處分其先有出身及前資官應者請准學究一經例處分又奏歷代史書皆記當時善惡係以褒貶垂裕勸戒其司馬遷史記班固范曄兩漢書音義詳明懲惡勸善亞於六經堪爲世教伏惟國朝故事國子學有文史直者宏文館宏文生並試以史記兩漢書三國志又有一史科近日以來史學都廢至於有身處班列朝廷舊章昧而莫知況乎前代之載焉能知之伏請置前件史科每史問大義一百條策三道義通七策通二以上爲及第能通一史者請同五經三傳例處分其有

出身及前資官應者請同學究一經例處分有出身及前資官優稍與處分其三史皆通者請錄奏聞特加獎擢仍請頒下兩都國子監任生徒習讀勅旨宜依仍付所司

童子

廣德二年五月二十四日勅孝弟力田科其每歲貢宜停童子每歲貢者亦停童子仍限十歲以下者至大曆三年四月二十五日勅童子舉人取十歲以下者習一經兼論語孝經每卷誦文十科全通者與出身仍每年

冬本貫申送禮部同明經舉人例考試訖聞奏至十年五月二十五日勅童子科宜停開成三年十二月勅諸道應薦萬言童子等朝廷設科取士門日至多有官者合詣吏曹未仕者即歸禮部文詞學藝各盡其長此外更或延引則為冗長起今以後不得更有聞薦俾由正路禁絕倖門雖有是命而以童子為薦者比比有之

明法

貞元二年六月勅明法舉人有能兼習一經小帖義通者依明法例處分

唐會要卷七十七

宋

王

溥

撰

貢舉下

科目雜錄

太和元年十月中書門下奏凡未有出身未有官如有文學祇合於禮部應舉有出身有官方合於吏部赴科目選近年以來格文差誤多有白身及用散試官并稱鄉貢者並赴科目選及注擬之時即妄論資次曾無格例有司不知所守其有宏辭拔萃開元禮學究一經則

有定制然亦請不任用在散試官限其三禮三傳一史三史明習律令等如白身並令國學及州府同明經一史三禮三傳同進士三史當年關送吏部便授第二任官如有出身及有正員官本是吏部常選人則任於吏部不限選數應科目選仍須檢勘出身及授官無踰濫否緣取學藝其餘文狀錯繆則不在駁放限如考試登科並依資注與好官唯三史則超一資授官如制舉人暨諸色人皆得選試則無出身無官人並可亦請不用散試官伏以散試偶於諸道甄錄處得便第二第三任

官既用虛銜及授官則勝進士及諸色及第登科人授官實恐僥倖勅旨依奏

大中十年五月中書門下奏據禮部貢院見置科目內開元禮三禮三傳三史學究道舉法算童子等九科近年取人頗濫曾無實藝可採徒添入仕之門須議條流俾精事業臣等已於延英面奏伏奉聖旨將文字奏來者其前件九科臣等商量望起大中十年權停三年滿後至時赴科試者令有司據所舉人先進名令中書舍人重覆問過如有本業稍通堪備朝廷顧問卽作等第

唐會要 卷一百一十一
進名候勅處分如事業荒蕪不合送名而妄送者考官先議朝責其童子近日諸道所薦送者多年齒已過考其所業又是常流起今已後望令天下州府薦童子並須實年十一十二已下仍須精熟經旨全通兼自能書寫者如違條例本道長吏亦宜議懲罰從之

咸通四年二月進士皮日休上疏請以孟子爲學科曰臣聞聖人之道不過乎經經之降者不過乎史史之降者不過乎子子不異乎道者孟子也今國家有業莊列之書者亦登於科其誘善也雖深而懸科也未正伏望

命有司去莊列之書以孟子爲主有能精通其義者其科選視明經同疏奏不答

宏文崇文生舉

開元二十六年正月八日勅文宏文崇文生緣是貴胄子孫多有不專經業便與及第深謂不然自今已後一依令式考試至天寶十四載二月十日宏文館學生自今已後宜依國子監學生例帖試明經進士帖經並減半雜文及策皆須粗通仍永爲恆式

廣德元年七月二十六日勅宏文崇文兩館生皆以資

唐會要 卷一百一十一
三
蔭補充所習經業務須精熟楷書字體皆得正樣通者與出身不通者罷之

貞元四年正月勅應補宏文崇文學生員闕至少請補者多就中商量須有先後伏請准建中三年十一月勅先補皇總麻已上親及次宰輔子孫仍於同類之內所用蔭先盡門地清華履歷要近者其餘據官蔭高下類例處分六年九月勅本置兩館學生皆選勳賢胄子蓋欲令其講藝紹襲家風固非開此倖門隳紊典教且令式之內具有條章考試之時理須精覈比聞此色倖冒

廣深或假市門資或變易昭穆殊愧教化之本但長僥競之風未補者務取闕員已補者自然登第用蔭既已乖實試藝又皆假人誘進之方豈當如此自今已後所司宜據式文考試定其升黜如有假貸並准法處分太和七年八月九日勅宏文崇文兩館生今後並依式試經畢日仍差都省郎官兩人覆試須責保任不得輒許替代

九年十二月中書門下奏奉進止令減下諸色入仕人其宏文館學生見定十六人今請減下一人勅旨依奏

開成三年二月兩軍使狀稱請准太和元年五月十七日以前勅文官階至品便許用蔭與子孫補兩館生出身勅旨神策大將軍用蔭補兩館生宜准左右金吾大將軍例處分

崇元生

道舉附

開元二十九年正月十五日于元元皇帝廟置崇元學令習道德經莊子文子列子待習成後每年隨舉人例送名至省准明經考試通者准及第人處分其博士置一員

天寶元年五月中書門下奏兩京及諸郡崇元學生等伏准開元二十九年正月制前件人合習道德南華通元沖虛等四經又准天寶元年二月制改庚桑子爲洞靈真經准請條補崇元學亦合習讀伏准後制合通五經其洞靈真經人間少本臣近令諸觀尋訪道士全無習者本旣未廣業實難成并沖虛通元二經亦恐文字不定元教方闡學者宜精其洞靈等三經望付所司各寫十本校定訖付諸道採訪使頒行其貢舉司及兩京崇元學生亦望各付一本今冬崇元學人望且准開元

二十九年正月制考試其洞靈真經請待業成後准式從之

二年三月十六日制崇元生試及帖策各減一條三年業成始依常式

七載五月十三日崇元生出身至選時宜減於常例一選以爲留放

十三載十月十六日道舉停習道德經加周易宜以來載爲始至寶應三年六月二十日道舉宜停七月二十六日勅禮部奏道舉既停其崇元生望付中書門下商

量處分

大曆三年七月增置崇元生員滿一百
建中二年二月中書門下奏准制崇元館學生試日減策一道者其崇元館附學官見任者既同行事理合霑恩惟策一道不可更減大義兩條從之

論經義

貞觀十二年國子祭酒孔穎達撰五經義疏一百七十卷名曰義贊有詔改爲五經正義太學博士馬嘉運每倚撫之有詔更令詳定未就而卒

唐會要 卷七十七 六
永徽二年三月十四日詔太尉趙國公長孫無忌及中書門下及國子三館博士宏文學士故國子祭酒孔穎達所撰五經正義事有遺謬仰卽刊正至四年三月一日太尉無忌左僕射張行成侍中高季輔及國子監官先受詔修改五經正義至是功畢進之詔頒於天下每年明經依此考試

長安三年三月四門博士王元感表上尚書糺謬十卷春秋振滯二十卷禮記繩愆三十卷并所註孝經史記漢書蒙請官給紙筆寫上秘閣制令宏文崇文兩館學

士及成均博士詳其可否宏文館學士祝欽明崇文館學士李憲趙元亨成均博士郭山憚皆專守先儒章句深譏元感掎摭舊義元感隨方應答竟不之屈唯鳳閣舍人魏知古司封郎中徐堅左史劉知幾右司張思敬雅好異聞每爲元感申理其義由是擢拜太子司議郎開元七年三月一日勅孝經尚書有古文本孔鄭註其中旨趣頗多踳駁精義妙理若無所歸作業用心復何所適宜令諸儒并訪後進達解者質定奏聞其月六日詔曰孝經者德教所先自頃已來獨宗鄭氏孔氏遺旨

唐會要 卷七十一
今則無聞又子夏易傳近無習者輔嗣注老子亦甚甄明諸家所傳互有得失獨據一說能無短長其令儒官詳定所長令明經者習讀若將理等亦可並行其作易者並帖子夏易傳共寫一部亦詳其可否奏聞時議以爲不可遂停

其年四月七日左庶子劉子元上孝經註議曰謹按今俗所行孝經題曰鄭氏註爰自近古皆云鄭卽康成而魏晉之朝無有此說至晉穆帝永和十一年及孝武帝太元元年再聚羣臣共論經義有荀昶者撰集孝經諸

說始以鄭氏爲宗自齊梁以來多有異論陸澄以爲非元所註請不藏於秘省王儉不依其請遂得見傳於時魏齊則立於學官著在律令蓋由庸俗無識故致斯訛舛然則孝經非元所註其驗十有二條據鄭君自序云遭黨錮之事逃難註禮黨錮事解註古文尚書毛詩論語爲袁譚所逼來至元城乃註周易都無註孝經之文其驗一也鄭元卒後其弟子追論師所著述及應對時人謂之鄭志其言鄭所註者惟有毛詩三禮尚書周易都不言鄭註孝經其驗二也又鄭志目錄記鄭之所註

唐會要 卷七十一
五經之外有中候書傳七政論乾象歷六藝論毛詩譜
答臨碩難禮駁許慎異義發墨守箴膏肓及答甄子然
等書寸紙片札莫不悉載若有孝經之註無容匿而不
言其驗三也鄭之弟子分授門徒各述師言更相問答
編錄其語謂之鄭志唯載詩書禮易論語其言不及孝
經其驗四也趙商作鄭先生碑銘具稱其所注箋駁論
亦不言注孝經晉中經簿周易尚書尚書中候尚書大
傳毛詩周禮儀禮禮記論語凡九書皆云鄭氏注名元
至於孝經則稱鄭氏解無名元二字其驗五也春秋緯

演孔圖云康成注三禮詩易尚書論語其春秋孝經別
有評論宋均於詩譜云序我先師北海鄭司農則均是
元之傳業子弟也師所著述無容不知而云春秋孝經
唯有評論非元之所著於此特明其驗六也宋均孝經
緯注引鄭六藝論敘孝經云元又爲之注司農論如是
而均無聞焉有義無辭令余昏惑舉鄭之語而云無聞
其驗七也宋均春秋緯註云元爲春秋孝經畧說則非
註之謂所言元又爲之註者汎辭耳非事實序春秋亦
云元又爲之注也寧可復責以實注春秋乎其驗八也

唐會要 卷之十一
後漢史書存於世者有謝承薛瑩司馬彪袁山松等具
爲鄭元傳者載其所注皆無孝經其驗九也王肅孝經
傳首有司馬宣王之奏並奉詔令諸儒注述孝經以肅
說爲長若先有鄭注亦應言及而不言鄭其驗十也王
肅著書發揚鄭短凡有小失皆在聖證若孝經此注亦
出鄭氏被肅攻擊最應煩多而肅無言其驗十一也魏
晉朝賢辨論時事鄭氏諸注無不撮引未有一言引孝
經之注其驗十二也凡此證驗易爲考覈而世之學者
不覺其非乘彼謬說競相推舉諸解不立學官此注獨

行於世觀夫言語鄙陋固不可示彼後來傳諸不朽至
如古文孝經孔傳本出孔氏壁中語其詳正無俟商確
而曠代亡逸不復流行至隋開皇十四年秘書學士王
孝逸於京市陳人處置得一本送與著作郎王劭以示
河間劉炫仍令校定而更此書無兼本難可依憑炫輒
以所見率意刊改因著古文孝經稽疑一篇劭以爲此
書經文盡在正義甚美而歷代未嘗置於學官良可惜
也然則孔鄭二家雲泥致隔今綸音發問校其短長愚
謂行孔廢鄭於義爲允又今俗所行老子是河上公注

其序云河上公者漢文帝時人結草庵於河曲乃以爲號所注老子授文帝因沖空上天此乃不經之鄙言流俗之虛語按漢書藝文志注老子者三家河上所釋無聞焉爾豈非注者欲神其事故假造其說耶其言鄙陋其理乖訛豈如王弼所著義旨爲優必黜河上公升王輔嗣在於學者實得其宜又按漢書藝文志易有十三家而無子夏作傳者至梁阮氏七錄而有子夏易六卷或云韓嬰作或云丁寬作然據漢書藝文志韓易有二篇丁易有八篇求其符合則事殊曠刺者矣歲越千齡

經百代其所著述沈翳不行豈非後來假憑先哲亦如石崇謬稱阮籍鄭璞濫名周寶必欲行用深以爲疑臣竊以鄭氏孝經河上公老子二書訛舛不足流行孔王兩家實堪師授每懷此意其願莫從伏見去月十日勅令所司詳定四書得失具狀聞奏臣等尋草議請行王孔二書牒禮部訖如狀爲允請卽頒行國子祭酒司馬貞議曰今文孝經是漢河間王所得顏芝本至劉向以此本參校古文省除煩惑定爲此一十八章其注相承云是鄭元所著而鄭志及目錄等不載故往賢其疑

唐會要 卷一百一十一
焉唯荀昶范煜以爲鄭注故昶集解孝經具載此注而其序云以鄭爲主是先達博選以此注爲優且其注縱非鄭氏所作而義旨敷暢將爲得所其數處小有非穩實亦非爽經傳其古文二十二章元出孔壁先是安國作傳緣遭巫蠱世未之行荀昶集注之時尚有孔傳中朝遂亡其本近儒欲崇古學妄作此傳假稱孔氏輒穿鑿改更又僞作閨門一章劉炫詭隨妄稱其善且閨門之義近俗之語非宣尼之正說案其文云閨門之內具禮矣乎嚴兄妻子臣繇百姓徒役也是比妻子於徒役

文句凡鄙不合經典又分庶人章從故自天子以下別爲一章仍加子曰二字然故者連上之辭既是章首不合言故古文旣亡後人妄開此等數章以應二十二章之數非但經文不真抑且傳習淺僞又注因天之時因地之利其畧曰脫衣就功暴其肌體朝暮從事露髮跣足少而習之其心安焉此語雖傍出諸子而引之爲注何言之鄙俚乎與鄭氏所云分別五土視其高下高田宜黍稷下田宜稻麥優劣懸殊曾何等級今議者欲取近儒詭說殘經缺傳而廢鄭注理實未可望請隄式孝

經鄭注與孔傳依舊俱行又注老子河上公蓋憑虛立號漢史實無其人然其注以養神爲宗以無爲爲體其辭近其理宏小足以修身絜誠大可以寧人安國且河上公雖曰注書卽文立教皆旨詞明近用斯可謂知言矣王輔嗣雅善元談頗深道要窮神用於橐籥守靜默於元牝其理暢其旨微在於元學頗是所長至若近人立徵修身宏道則河上爲得今望請王河二注令學者俱行又按劉向七略有子夏易傳但此書不行已久今所存者多非真本又荀勗中經簿云子夏傳四卷或云

丁寬所作是先達疑非子夏矣又隋書經籍志云子夏傳殘缺梁時六卷今三卷是知其書錯謬多矣無益後學不可將帖正經

其年五月五日詔曰間者諸儒所傳頗乖通議敦孔學者冀鄭門之息滅尙今文者指古傳爲誣僞豈朝廷並列書府以廣儒術之心乎其河鄭二家可令依舊行用王孔所注傳習者稀宜存繼絕之典頗加獎飾子夏傳逸篇旣廣前令帖易者停

十四年八月六日太子賓客元行沖等撰禮記義疏五

唐會要 卷七十一
十卷成奏上之先是右衛長史魏光乘上言今禮記章句踳駁故太師魏徵更編次改注堪立學傳授上遽令行沖集學者撰義疏將立學官行沖於是引國子博士范行恭四門助教施敬本檢討刊削及疏成右丞相張說駁奏曰今之禮記是前漢戴德戴聖所編歷代傳習已向千年著爲經教不可刊削至魏之孫炎始改舊本以類相比有同抄書先儒所引竟不行用貞觀中魏徵因孫炎所修更加釐改兼爲之注雖加賞賜其書竟亦不行今行沖等奉勅撰疏勒成一部欲與先儒義章句

隔絕若欲行用竊恐未可上然其奏遂留其書貯於內府竟不得立學行沖怨諸儒排已退而著論以自釋也其年八月十四日上讀洪範至無頗以聲不協韻因改頗爲陂詔曰每讀尙書洪範至遵王之義三復茲句常有所疑據其下文並皆協韻惟頗一字實卽不倫又周易泰卦中無平不陂釋文云陂有頗音陂之與頗訓詁無別爲陂則文亦會意爲頗則聲不成文應由煨燼之餘編簡遂缺傳授之際差舛相沿原始要終須有刊革洪範無頗字宜改爲陂庶使先儒之義去彼膏肓後學

唐會要 卷之七十一
之徒正其魚魯仍宣示國學

天寶五載正月二十三日詔曰禮記垂訓篇目攸殊或未盡於通體是有乖於大義借如堯命四子所授惟時周分六官曾不繫月先王行令蓋取於斯苟分至之可言何弦望之足舉其禮記月令宜改爲時令

其載二月二十四日詔曰朕欽承聖訓覃思元經頃改道德經載字爲哉仍隸屬上句及乎廷議眾以爲然遂錯綜真銓因成註解又孝經書疏雖粗發明幽蹟無遺未能該備今更敷暢以廣闕文仍令集賢院具寫送付

所司頒示中外

貞元七年十二月秘書監包佶奏開元刪定禮記月令爲時令其音及義疏並未刊正其開元禮所與月令相涉者請選通儒詳定從之

開成二年八月勅新加九經字樣一卷國子監奏定得覆定石經字體翰林待詔唐元度狀伏准太和七年二月勅覆定九經字體者令所詳覆多依司業張參五經字爲准其舊字樣歲月將久畫點參差傳寫相承漸致乖誤今並依字樣書參詳改邪就正訖諸經之中分別

疑闕舊字樣未載者古今體異隸篆不同如總據說文
卽古體驚俗若近代之文字或傳寫乖訛今與校勘官
同商較是非取其適中纂錄爲新加九經字樣一卷或
經典相承與字義不同者引文以註解今刊削成請附
於九經字樣之末勅旨宜依

諸使上

觀風俗使

自貞觀八年
以後不置

貞觀八年正月二十九日詔曰昔者明王之御天下也
內列公卿允釐庶績外廷侯伯司牧黎元惟懼淳化未

敷名教或替故有巡狩之典黜陟幽明行人之官存省
風俗時雍之化率由茲道宜遣大使分行四方申諭朕
心延問疾苦觀風俗之得失察政刑之苛弊務盡使乎
之旨俾若朕親覲焉於是分遣蕭瑀李靖楊恭仁竇靜
王珪李大亮劉德威皇甫無逸韋挺李襲譽張亮杜正
倫趙宏智等巡省天下

巡察按察巡撫等使

貞觀十八年遣十七道巡察諫議大夫褚遂良諫曰臣
以爲自去年九月不雨經冬無雪至今年二月下澤麥

苗如是小可使人今出正是農時普天之下不能無事東州追掩西郡呼集兼復送迎使人供擬飲食道路違違廢於田種使人今猶未發時節如是小遲望更過今夏至來年正月初發遣書曰萬方有罪在予一人國家但得四方整肅何必要須罪罰

二十年正月遣大理卿孫伏伽等二十二人以六條巡察四方多所貶黜舉奏太宗命褚遂良一其類具狀以聞及是親自臨決牧宰以下以能官進擢者二十人罪死者七人流罪以下及免黜者數百人

儀鳳二年五月河南河北旱遣御史中丞崔謚等分道存問賑給侍御史劉思立上疏曰今麥序方秋蠶功未畢三時之務萬姓所先勅使撫巡人皆悚怖忘其家業冀此天恩踴躍參迎必難抑止集眾既廣妨廢亦多加以途程往還兼之晨夕停滯既緣賑給須立簿書本欲安存卻成煩擾又無驛之處取馬稍難簡擇公私須先追集雨後農要特切常情暫廢須臾卽虧歲計每爲一馬遂勞數家從此相承恐更滋甚望且委州縣賑給待秋後閒時出使褒貶

唐會要 卷一百一十一
垂拱元年秘書省正字陳子昂上疏曰臣伏見陛下憂勞百姓恐不得其所將降九道大使巡察天下諸州兼申黜陟以求民瘼臣竊以爲未盡善也何以言之陛下所以降明使豈非欲天下黎元眾庶知陛下夙興夜寐憂勤之念陛下必若以此而發使乎則愚臣竊見陛下之使又未盡也若愚臣所請使者先常雅合時望爲眾人所推慈愛足以恤孤惻賢德足以振幽滯剛直足以不避強禦明智足以照察奸邪然後使天下奸人畏其明而不敢爲惡也天下強禦憚其直而不爲過也天下

英傑慕其德而樂爲之用也天下孤寡賴其仁而欣戴其德也夫如是然後可以論出使故輜軒未動於京師天下翕然皆已知矣今陛下使猶未出朝廷行路市井之人皆以爲非在朝廷之有職者亦不稱之天子之使未出魏闕朝廷之人皆已輕之何況天下之眾哉而欲黜陟求賢未可得也陛下所以有此失者在不選人亦輕此使非天下之任故陛下遂大失於此苟以出使爲名不求任使之實使愈出而天下愈弊使彌多而天下彌不寧其故何哉是朝廷輕其任也徒使天下百姓修

唐會要 卷之十一
飾道路送往迎來無益於聖教耳臣久爲百姓實委知之臣願陛下與宰相更妙選朝廷百官素有威重名節爲眾所推者陛下因大朝日親御正殿集百寮公卿設禮儀以使者之禮見之告以出使之意遂授以旌節而遣之先是京師而訪豺狼然後攬轡登車以清天下若如是臣知陛下聖教不旬月之間天下家見而戶聞也此之一使是陛下爲政之大端諺曰欲知其人先觀其所使不可不慎也若陛下必知不可得其人不如不出使以煩數無益於化但勞天下之人是猶烹小鮮而數

撓之耳四月六日尙書左丞狄仁傑充江南安撫使吳楚多淫祠仁傑一切焚之凡除一千七百所天授二年發十道存撫使以右肅政御史中丞知大夫事李嗣真等爲之閤朝有詩送之名曰存撫集十卷行於世杜審言崔融蘇味道等詩尤著焉

萬歲通天元年鳳閣舍人李嶠上疏曰陛下創置左右臺分巡天下察吏人善否觀風俗得失斯政途之綱紀禮法之準繩無以加也然猶有未折衷者臣請試論之夫禁網尙疎法令宜簡簡則事易行而不煩雜疎則所

唐會要 卷七十七
羅廣而無苛碎竊見垂拱二年諸道巡察使科目凡四十四件至於別作格勅令訪察者又有三十餘條而巡察使率是三月之後出都十一月終奏事時限迫促簿書委積晝夜奔逐以赴限期而每道所察文武官多至二千餘人少尙一千已下皆須品量才行褒貶得失欲令曲盡行能皆所不暇此非敢惰於職而慢於官也實才有限而力不及耳臣望量其功程與其節度使器用於用力濟於時然後進退可以責成得失可以精覈矣
聖歷元年十月納言狄仁傑爲河北河朔安撫使及迴

上疏曰臣聞朝廷識者以契丹作梗始明人之順逆或有迫脅或有願從或授僞官或爲招慰或兼外賊或是士人跡雖不同心實無別誠以山東強猛由來重氣一顧之勢至死不迴近緣軍機調發傷重家道悉破或至逃亡別屋賣田人不爲售內顧生計四壁皆空重以官曲侵漁因事而起當州役使十倍軍機官私不矜期之必取枷杖之下痛切肌膚事迫情危不修禮義愁苦之地不樂其生有利則歸且圖賒死此乃君子之媿辱小人之常行今以負罪之位必不在家露宿草行潛竄山

澤赦之則出不赦則逃山東羣盜因緣聚結臣以近塵雖起不足爲憂中國不安以此爲事臣聞持大國者不可以小道治事廣大者不可以苛細分人主恢宏不拘常法罪之則眾情恐懼恕之則反側自安伏願曲赦河北諸州一無所問自然人神通暢率土歡心

神龍二年二月勅左右臺內外五品已上官識治道通明無屈撓者二十人分爲十道巡察使二周年一替以廉按州部

景龍三年置十道按察使分察天下至開元八年五月

復置十道按察使以陸象先王皎等爲之

開元元年二月禮部侍郎張庭珪上疏曰天下至大郡邑至多賢牧良宰誠難盡得兼下僚貪暴小吏侵漁黎庶不安窮困眾矣縱其發使廉問暫往速還假申今冤卻招後患各思鉗口無敢率心臣竊見國家比置十道按察使不限年月懲惡勸善激濁揚清孤窮獲安風俗一變伏望復下明制重選使臣秋冬之後令出巡察自然貪吏望風懲革陛下視聽恆遍於海內矣

三年三月勅巡察使出宜察官人善惡其有戶口流散

籍帳隱沒賦役不均者不務農桑倉庫減耗者妖訛宿宵姦猾盜賊不事生業爲公私蠹害者德行孝弟茂才異等藏器晦迹堪應時用者並訪察聞奏

興元元年正月詔令門下平章事蕭復充山南東西荆南湖南淮南江西鄂岳浙江東西福建嶺南等道宣慰安撫使嗚呼往率乃職敬敷朕命慰勉征戍勞來困窮訪其所安察其所弊滯淹必達冤濫必申無憚幽遠而不被無忽細微而不恤

貞元八年八月詔曰朕以薄德託於人上勵精庶政思

致雍熙而誠不動天政或多闕陰氣作沴暴風薦臻自江淮而及乎荆襄歷陳宋而施於河朔其間郡邑連有水災城郭多傷公私爲害損壞廬舍浸敗田苗或親戚漂淪或資產沈溺言念於此當食忘飧宜令中書舍人奚陟往江陵及襄郡隨復鄂申光蔡等州左庶子姚齊語往陳宋亳潁徐泗濠等州秘書少監雷咸往鎮冀德隸深趙等州京兆少尹韋武往揚楚廬潤壽滁蘇常湖等州宣撫應諸州百姓因水不能自存者委宣撫使賑給死者各加賜物在官爲收埋埋瘞其田苗所損委宣

撫使與所在長吏速具聞奏於戲一夫不獲一物失所
刑罰不中賦役不均皆可以失陰陽之和致雨旱之沴
繫囚及獄訴久不決者委所在長吏卽與疏辯務從寬
簡俾絕冤滯貪官暴吏苛法害公特加懲罰用明典憲
災傷之後切在撫綏咨爾方鎮之臣洎乎守宰咸宜悉
乃心力以恤凶災宣布朕懷使各知悉
永貞元年八月詔曰治天下者先修其國國命之重寄
在方鎮方鎮其治實維列城列城爲政繫於屬縣然則
一夫之耕匹婦之織積微方著以供國計永懷蒸庶厥

惟難哉頃年以上准租賦及權稅委在藩服使其均平
太上皇君臨之初務從省便遂令使府歸在中朝或恐
巡按旣多職因交替新制未立舊綱已紊況河汴而東
瀕海之右名都奧壤疆理接連如或徵賦不均輓輸難
濟物輕貨重法弊人勞又聞江淮數道比憊時雨深憂
黎庶之不足軍國之缺供政有所不宣事有所未便牧
宰有課績官吏有藏否爰使使臣申我休命宜令度支
及諸道鹽鐵轉運戶部侍郎兼御史大夫潘孟陽專往
宣諭慰安疲毗詢訪便益蠲除疾苦安民利國稱朕意

馬

元和四年正月以左司郎中鄭敬使湖南宣歙吏部郎中崔元使浙東司封郎中孟簡使山南東道荆南湖南京兆少尹襄武使江西鄂岳等道宣撫將行並召對上告之曰朕宮中用度一匹以上皆有簿歷惟拯救百姓則不計所費焉卿等今者賑恤災旱當勤於奉職勿如潘孟陽所到務飲酒遊山寺而已仍許敬等以便宜行事以孟簡獨衣綠遣使追賜緋袍銀魚

十四年二月淄青都知兵馬使劉悟斬逆賊李師道淄

青兗鄆等十二州平詔戶部侍郎楊於陵以本官充淄青等州宣撫使

唐會要卷七十八

宋

王

溥

撰

諸使中

黜陟使

貞觀八年將發十六道黜陟大使畿內未有其人上問房元齡此道事最重誰可充使尚書右僕射李靖曰畿內事大非魏徵莫可上曰朕今欲向九成宮事亦不小朕每行不欲與其相離者乃為其見朕是非得失必無所隱乃命李靖充使

唐會要 卷之八十八
二十年正月遣大理卿孫伏伽等以六條巡察四方黜陟官吏

開元二十九年十月二十一日遣使以崔翹等爲之天寶五載正月遣使以席豫等爲之

至德三載四月遣使以虢王巨等爲之

建中元年正月制諸道宜分遣黜陟使觀風俗問疾苦自艱辛以來徵賦名目繁雜委黜陟使與諸道觀察使刺史計資產作兩稅法比來新舊徵科色目一切停罷兩稅外輒別配率以枉法論乾元元年與採訪使並權

罷至是復置之自建中已後至今未嘗置初司封郎中韋楨爲山南黜陟使薦興鳳兩州團練使嚴震理行爲山南第一特賜上下考封鄖國公在鳳州十四年能政不替

採訪處置使

宰相張九齡奏置

開元二十二年二月十九日初置十道採訪處置使以御史中丞盧絢等爲之至三月二十三日諸道採訪處置使華州刺史李尚隱等奏請各使置印許之二十五年十二月二十四日命諸道採訪使考課官人善績三

年一奏永爲常式至二十七年二月七日赦文三載考績黜陟幽明允叶大猷以勸天下比來諸道所通善狀但優仕進之輩與爲選調之資責實徇名或乖古義自今已後諸道使更不須善狀每三年朕當自擇使臣觀察風俗有清白政理著聞者當別擢用

二十六年三月勅諸道採訪使判官等自今已後並須首末經三年其緣事故停不得滿年限者承優節文準開元二十四年二月十九日勅處分

二十九年七月勅採訪使等所資按部恤隱求瘼巡撫

處多事須周細不可匆遽徒有往來宜準刺史例入奏天寶九載三月勅本置採訪使令舉大綱若大小必由一人豈能兼理數郡自今已後採訪使但察訪善惡舉其大綱自餘郡務所有奏請並委郡守不須干及
十二載二月河南道採訪處置使河東郡太守李愷河南道採訪處置使陳留郡太守王濬等奏請依舊通前置兩員交使望以周載許依元勅酬功處分勅諸道準此黔中道各一人宜依舊定

乾元元年四月十一日詔曰近緣狂寇亂常每道分置

唐會要 卷一百一十八
節度其管內緣徵發及文牒兼使命來往州縣非不艱
辛仍加採訪轉益煩擾其採訪使置來日久并諸道黜
陟使便宜且停待後當有處分其年改爲觀
察處置使
大曆十二年五月中書門下奏開元末置諸採訪使許
其專停刺史務廢置由已請自今已後刺史有犯贓等
色本道但具狀聞奏不得輒追赴使及專擅停務差人
權攝其刺史亦不得輒詣使出界未先聞奏皆按常刑

五坊宮苑使

五坊謂鵬鵠鷹隼狗其爲五坊宮苑舊以一使

掌之自寶應二年後五坊使人隸內宮苑使近
又有閑廐使兼宮苑之職焉

開元十九年金吾將軍楊崇慶除五坊宮苑使其後來
曜牛仙客李元祐韋衢章仇兼瓊王鉷呂崇賁李輔國
彭體盈藥子昂等爲之

大曆十四年五月詔鷹隼豹狃獵犬皆放之時以永徽
已來文單國累貢馴象三十有二皆豢於禁中有善舞
者以備元會充庭之飾因是與鷹隼之類同放之
元和二年六月勅五坊戶諸色影占者多宜令府縣收

管

三年七月五坊品官朱超晏王志忠放縱鷹隼入長安富人家旋詣其居廣有求取上知之立召二人各笞二十奪其職自是貢贄烏略大者皆斥之貞元末五坊小兒張捕烏雀羅於閭里者皆爲暴橫以取人錢物或有張羅網於門不許人出入者或以張井上使不得汲者近之輒曰汝驚供奉烏雀卽痛毆之出錢物求謝乃去或相聚飲食於酒肆醉飽而去賣者或不知就索其直多被毆詈或時留地一囊爲質曰此地所以食烏雀而

捕之者今留付汝幸善飼之勿令飢渴賣者媿謝求哀乃攜挈而去憲宗在春宮時知其弊嘗欲奏禁之及卽位遂推而行之人情大悅

十三年十月上怒五坊使楊朝汶追捕平人命殺之

皇城使

天祐三年閏十二月皇城使奏伏以皇城之內咫尺禁闈伏乞準元勅條流鼓聲絕後禁斷人行近日軍人百姓更點動後尙恣夜行特乞再下六軍止絕從之

元帥

武德元年六月七日秦王世民加西討元帥

上元三年三月相王旦除涼州道行軍元帥周王顯除
洮河道行軍元帥昇儲後至聖歷元年九月又除河北
道元帥亦稱天罰道元帥大足元年六月相王旦除安
北道行軍元帥至長安二年九月又除并州道行軍元
帥自後親王爲銜者甚多其元帥之號自武德已來唯
王始拜至天寶十五載正月哥舒翰除諸道兵馬元帥
始臣下爲之乾元二年三月郭子儀除東畿山東河南
諸道節度防禦兵馬元帥後上元二年七月李光弼除

河南淮南淮西山南東道荆南五節度行營元帥此並
副元帥也

至德元載以廣平王爲天下兵馬元帥統大軍東征以
子儀爲副其載九月吏部尚書平章事房琯抗疏請兵
一萬人自爲元帥以收兩京詔許之以兵部尚書王思
禮爲副分爲三軍使楊希文將南軍自宜壽入劉貴慙
將中軍自武功入李光進將北軍自奉天入而琯以中
軍爲帥次便橋二軍先遇賊戰於陳濤斜王師敗績時
琯以車二千乘以馬步夾之爲乘車之戰賊順風揚塵

唐會要 卷之十八
鼓噪牛皆振駭因縛草縱火焚之人畜大亂故敗瑄自將南軍又戰不利楊希文劉貴愆降於賊瑄幕府偏裨等奔赴行在肉袒請罪詔並宥之

建中四年九月以舒王謨爲揚州大都督持節充荆襄江西沔鄂等道節度諸軍行營兵馬都元帥仍賜名誼改封晉王大開幕府文武僚屬之盛前後出師未見其比

天復三年二月以輝王祚爲諸道兵馬元帥其年十二月十三日勅國史所書元帥之任並以天下爲名乃自

近年設爲諸道宜卻復爲天下兵馬元帥

都統

乾元元年十二月戶部尙書李峘除都統淮南江東江西節度宣慰觀察處置等使都統之號始於此

上元二年八月李若幽除戶部尙書充朔方鎮西北庭興平陳鄭等九節度行營兵馬及河中節度都統處置使

建中元年十二月以汴州節度使李勉充河南汴州宋滑毫河陽等道都統使

元和四年九月以邠寧慶三州節度高崇文充南京都統

大中五年五月以特進守司空兼門下侍郎平章事白敏中充邠寧節度使招討南山平夏黨項兵馬都統處置等使

元和四年九月以宣武軍節度韓宏充淮西諸軍行營兵馬都統

乾符五年黃巢大掠江淮宰相王鐸進奏曰臣忝宰執之長在朝不足分陛下之憂願自帥諸軍盪滌羣寇朝

議然之乃拜守司空平章事荆南節度使諸道行營兵馬都統其年以鎮海軍節度使高駢為諸道行營兵馬都統

中和二年七月復以宰相王鐸為京城四面諸道行營兵馬都統以崔安潛副之至大順元年五月以宰臣張濬為太原四面行營兵馬都統

節度使 每使管內軍附

武德元年因隋舊制呼為大總管其年六月七日諸州總管加號使持節至七年二月十八日改大總管為大

都督

貞觀三年八月李靖除定襄道行軍大總管貞觀三年已後行軍即稱總管本道即稱都督永徽已後除都督帶使持節即是節度使不帶節者不是節度使景雲二年四月賀拔延嗣除涼州都督充河西節度使此始有節度之號遂至于今不改焉

朔方節度使開元元年十月六日勅朔方行軍大總管宜准諸道例改為朔方節度使其經略定遠豐安軍西中受降城單于豐勝靈夏鹽銀匡長安樂等州並受節

度至十四年七月除王峻帶關內支度屯田等使十五年五月除蕭曷又加鹽池使二十年四月除牛仙客又加押諸蕃部落使二十九年除王忠嗣又加水運使天寶五載十二月除張齊邱又加管內諸軍採訪使已後遂為定額

豐安軍在靈州黃河西去郡一百八十里

定遠軍在靈州東北二百里先天二年正月郭元振置

貞觀十四年三月十五日置靈朔大使以護突厥

節度之號

河東節度使開元十一年以前稱天兵軍節度其年三月四日改爲太原已北諸軍節度至十八年十二月宋之悌除河東節度已後遂爲定額

大同軍置在朔州本大武軍調露二年裴行儉改爲神武軍天授二年改爲平狄軍大足元年五月十八日改爲大武軍開元十二年三月四日改爲大同軍

橫野軍初置在飛狐復移于新州開元六年六月二十三日張嘉貞移于古代郡大安城南以爲九姓之援天寶十三載十二月一日改爲大德軍

尙嵐軍武德中爲鎮永淳二年改爲柵隸平狄軍長安三年李迥秀改爲景龍中軍張仁亶移軍朔方留一千人充守捉屬大武軍開元十二年崔隱甫又置軍十五年李暉又廢爲鎮其後又改爲軍

天兵軍聖曆二年四月置大足元年五月十八日廢長安元年八月又置景雲元年又廢開元五年六月二十四日張嘉貞又置十一年三月四日改爲太原已北諸軍節度使

清塞軍貞元十五年四月以清塞城爲軍

開元九年十一月四日河東河北不須別置支度並令節度使自領支度

隴右節度使開元元年十二月鄯州都督陽矩除隴右節度自此始有節度之號至十五年十二月除張志亮又兼經略支度營田等使已後爲定額

臨洮軍置在狄道縣開元七年移洮州縣就此軍焉

河源軍置在鄯州西南又云本趙充國亭候也

白水軍開元五年郭知運張懷亮置

安人軍置在星宿川鄯州西北界開元七年三月置

積石軍置在廓州達化縣西界本吐谷渾之地貞觀三年吐谷渾叛置靜邊鎮儀鳳二年置軍額焉

莫門軍置在洮州儀鳳二年置軍開元十七年洮州移隸臨洮軍百姓隸岷州置臨州二十七年四月又改爲洮州今爲臨洮軍是也

振武軍置在鄯州鄯城縣西界吐蕃鐵仞城亦名石堡城開元十七年三月二十四日信安王禕拔之置四月改爲振武軍二十九年十二月六日蓋嘉運不能守遂陷吐蕃天寶八載六月哥舒翰又拔之閏六月三日改

爲神武軍

威戎軍置在鄯州界開元二十六年五月杜希望收吐蕃新城置此軍

鎮西軍置在河州開元二十六年八月置

神策軍天寶十三載七月十七日隴右節度哥舒翰以前年收黃河九曲請分其地置洮陽郡內置軍焉以成如璆爲太守充神策軍使去臨洮軍二百餘里宛秀軍同前年分九曲置澆河郡內置軍焉以臧奉忠爲太守充軍使

保義軍元和元年二月改隴右經略使爲軍

河西節度使景雲二年四月賀拔延嗣爲涼州都督充河西節度使自此始有節度之號至開元二年四月除陽執一又兼赤水九姓本道支度營田等使十一年四月除張敬忠又加經略使十二年十月除王君奭又加長行轉運使自後遂爲定額也

赤水軍置在涼州西城本赤烏鎮有泉水赤因以爲名武德二年七月安修仁以其地來降遂置軍焉軍之大者莫過於此

新泉軍大足元年郭元振奏置開元五年改爲守捉
大斗軍本是守捉使開元十六年改爲大斗軍焉
建康軍置在甘肅二州界證聖元年王孝傑開四鎮回
以兩州界迴遠置此軍焉

寧寇軍舊同城守捉天寶二年五月五日遂置焉

玉門軍本廢玉門縣開元六年置軍焉

墨離軍本是月支舊國武德初置軍焉

豆盧軍置在沙州神龍元年九月置軍

白亭軍天寶十四載正月三日置

開元十四年三月二日勅河西長行轉運九姓卽隸入
支度使宜加支度判官一人

安西四鎮節度使開元六年三月楊嘉惠除四鎮節度
經略使自此始有節度之號十二年以後或稱磧西節
度或稱四鎮節度至二十一年十二月王斛斯除安西
四鎮節度遂爲定額又先天元年十一月史獻除伊西
節度兼瀚海軍使自後不改至開元十五年三月又分
伊西北庭爲兩節度至二十九年十月二十九日移隸
伊西北庭都督四鎮節度使至天寶十二載三月始以

安西四鎮節度封常清兼伊西北庭節度瀚海軍使
伊吾軍本昆吾國也置在伊州景龍四年五月置

天山軍置在西州漢車師前王故國地形高敞改名高
昌貞觀十四年置

瀚海軍置在北庭都護府本烏孫王境也貞觀十四年
置庭州文明元年廢州置焉長安二年十二月改爲燭
龍軍三年郭元振奏置瀚海軍

天山軍並在碎葉城

范陽節度使先天二年二月甄道一除幽州節度經略

鎮守使至開元十五年十二月除李尙隱又帶河北支
度營田使二十七年十二月除李適之又加河北海運
使天寶元年十月除裴寬爲范陽節度使經略河北支
度營田河北海運使已後遂爲定額
經略軍置在范陽城內延載元年置

漁陽軍在幽州北盧龍古塞開元十九年九月十七日
改爲靜塞軍

清夷軍垂拱二年媯州刺史鄭崇古奏置

威武軍大足元年置在檀州開元十九年九月二十七

唐會要 卷七十八
日改爲威武軍

北平軍在定州西三里

恆陽軍恆州郭下

高陽軍本瀛州開元二十年移在易州

唐興軍在莫州

橫海軍在滄州並開元十四年四月十二日置各以刺史爲使

懷柔軍在蔚州界先天元年八月八日置

鎮安軍貞元二年四月二十二日於燕郡守捉置

懷遠軍在故遼城天寶二年二月安祿山奏置焉

平盧軍節度使開元七年閏七月張敬忠除平盧軍節度使自此始有節度之號八年四月除許欽琚又帶管內諸軍諸蕃及支度營田等使二十八年二月除王斛斯又加押兩蕃及渤海黑水等四府經略處置使遂爲定額

平盧軍在柳城本古遼西之地

盧龍軍置在北平郡古孤竹國天寶二年置

開元十三年三月二十日勅平盧軍幽州太原朔方河

唐會要 卷之八十八
西隴右劍南等七道節度使宜各置木契行勘
劍南節度使開元五年二月齊景胄除劍南節度使支
度營田兼姚禱等州處置兵馬使因此始有節度之號
至八年除李潛始下兼兵馬使二十七年章仇兼瓊又
兼山南西道採訪使其後或兼或不兼無定制至上元
二年二月分爲兩川廣德二年正月八日合爲一道大
曆二年正月二十日又分爲兩川至今不改貞元十一
年九月韋臯爲節度就加統攝近界諸蠻兼西山八國
雲南安撫等使

天保軍置在恭州東南九十里開元二十九年置
洪源軍置在黎州漢黎郡也開元三年置軍
昆明軍置在嵩州開元十七年十一月置
嶺南節度使至德二載正月賀蘭進明除嶺南五府經
略兼節度使自此始有節度之號已前但稱五府經略
自此遂爲定額又云杜佑授嶺南節度使德宗興元朝
廷故事執政往往遺忘舊日嶺南節度常兼五管經略
使佑獨不兼蓋一時之誤其後遂不帶五管經略名目
至咸通三年五月分爲兩節度以廣州爲嶺南東道邕

州爲嶺南西道

清海軍天寶元年置在恩州

柔遠軍貞元七年三月二十三日置

淮南河南江東道乾元元年三月六日置節度使

鎮州節度使大曆十四年四月名其軍曰成德至天祐

二年九月改爲武順

汴宋潁毫節度使建中三年二月二日名其軍曰宣武

浙江節度使建中二年六月浙江東西節度使尋改爲

鎮海軍以團練爲節度從理潤州元和五年十一月團

練使奏丹陽軍北因置節度改爲鎮海今請依前置鎮
海軍從之

滑州節度使貞元元年五月罷滑州永平軍其年四月
名其軍曰義成

淮西節度使貞元二年二月改淮西節度爲淮寧軍

申光蔡等道節度使貞元十四年正月名其軍曰彰義

易定節度使貞元十五年三月滿城縣置永清軍建中

三年五月名其軍曰義武

安黃節度使貞元十九年二月名其軍曰奉義

陳許節度使貞元二十年四月名其軍曰忠武
徐州節度使貞元二十一年三月名其軍曰武寧至咸
通四年四月降為支郡隸兗州至十一年十一月改為
感化軍

劍南節度使元和二年二月改天威軍名曰天征軍
荆南節度使元和六年八月勅制荆南是賦稅之地與
關右諸鎮及河南河北有重兵處體例不同節度使之
外不合更置軍額因循已久煩弊實深嚴綬所請停永
安軍額宜依其合收錢米委嚴綬于當府諸縣蠲除不

支濟人戶均減訖聞奏

天平軍節度使元和十四年三月平李師道以所管十
二州分三節度馬總為天平軍節度王遂為兗海沂密
節度薛戎為平盧軍節度仍加押新羅渤海兩蕃使仍
舊為平盧軍賜兩蕃使印一面

河陽節度使會昌四年十月平劉禎以河陽三城鎮邊
使為孟州號河陽軍額憚二州隸焉

歸義軍節度大中五年八月沙州刺史張義潮以瓜沙
伊肅等十一州戶口來獻自河隴陷蕃百餘年至是悉

唐書卷一百一十八
獲故地乃以沙州爲歸義軍授義潮節度使
戎昭軍節度使天祐二年九月以金州置軍額三年四月復以爲州

義昌軍節度使太和五年正月以滄景德州號義昌軍
山南東道節度使乾元元年置節度元和十年十月分
爲兩節度以戶部侍郎李遜爲襄復郢等節度使右羽
林大將軍高霞寓爲唐鄧等州節度使景雲二年正月
二十九日勅諸節度除緣兵馬外不得別理百姓訴訟
事元和六年十月詔曰朕於百執事羣有司方澄源流

以責實効其諸道都團練使足修武備以靜一方而別
置軍額因加吏祿亦旣虛設頗爲浮費思去煩以循本
期省事以便人潤州鎮海軍宣州采石軍越州義勝軍
洪州南昌軍福州靜海軍等使額並宜停所收使已下
俸料一事以上各委本道充代百姓闕額兩稅仍具數
聞奏庶我愛人之心不至于惜費立制之意必在其正
名

十三年二月襄陽節度使李愬奏請判官大將已下官
凡一百五十員上不悅謂裴度曰李愬誠立奇功然奏

唐會要 卷之十八
請過當遂留中不下其年七月詔曰事關軍旅並屬節制務繫州縣悉歸察廉二使所領管轄諸道度支營田承前各別置使自艱虞以後各置因循方鎮除授之時或有兼帶此職遂令綱目所在各殊今者務修舊章思一法度去煩就理眾已爲宜唯別置營田處其使且令仍舊其忠武鳳翔武寧魏博山南東西橫海邠寧義成河陽等道支度營田使及淮南支度近已定省其餘諸道並准此處分初景雲開元間節度支度營田等使諸道並置又一人兼領者甚少艱難以來優寵節將天下

擁旄者常不下三十人例衙節度支度營田觀察使其邊界藩鎮增置名額者又不一前後六十餘年雖嘗增減官員及使額而支度營田以兩河諸將兼領故朝廷不議停廢至是羣盜漸息幸臣等奏罷之

乾符三年以宰臣鄭從讜爲北京留守河東節度使詔許自擇賓佐

親王遙領節度使

貞觀二年五月吳王恪除使持節大都督益綿邛眉雅等八州諸軍事益州刺史濮王泰除使持節大都督揚

唐會要 卷之八十八
州常海潤楚舒盧濠壽歙蘇杭宣東睦南和等十六州
諸軍事揚州刺史

開元四年正月二十九日鄴王嗣直除安北大都護充
安撫河東關內隴右諸蕃部落大使陝王嗣昇爲安西
都護充河西道及四鎮諸蕃部落大使安北大都護張
知運爲副都護親王遙領節度自茲始也其在軍節度
卽稱節度副大使知節度事十五年五月以慶王渾爲
涼州都督兼河西節度大使忠王浚爲單于大都護朔
方節度大使棣王琰爲太原已北諸軍節度大使鄂王

瑤爲幽州都督河北道節度大使營王滉爲京兆牧隴
右節度大使光王琚廣州都督五府節度大使儀王璣
河南牧穎王璠安東都護平盧節度大使永王璘荊州
大都督壽王瑁益州大都督劔南節度大使延王泗安
西大都護磧西節度大使盛王沐揚州大都督
建中元年八月以舒王誼爲涇原節度大使

貞元四年七月以虔王諒爲申光隨蔡節度觀察大使
七年七月以邕王源爲義武軍節度易定等州觀察使
九年十二月以通王諶爲宣武軍節度使

十年七月復以邕王諲為昭義軍節度使

十一年五月復以通王諶為河東節度大使北都留守
十六年九月以開府儀同三司虔王諒為徐州節度大
使觀察支度營田等使

元和二年八月以建王審為鄆州大都督淄青等州節
度觀察處置陸運海運押新羅渤海兩蕃等使

九年三月以遂王宥開府儀同三司充章義軍節度管
內營田申光蔡等州觀察處置等使

寶曆元年十二月以晉王普為昭義軍節度副大使知

節度事以劉悟子前將作監主簿從諫為節度留後

太和八年十二月以通王諶為幽州經略盧龍軍節度
副大使知節度事以權勾當幽州兵馬使史元忠為留
後開成五年十二月以福王綰為開府儀同三司行魏
州大都督充魏博等州節度觀察處置等使

會昌二年正月以撫王紘為開府儀同三司行幽州大
都督府長史充幽州盧龍軍節度觀察處置押奚契丹
兩蕃經略盧龍等軍大使

四年十一月以皇子鄂為開府儀同三司朔方軍節度

副大使知節度事時以黨項叛命故以親王制之
大中十一年以昭王訥為開府儀同三司成德軍節度
副大使知節度事以佐司馬王紹知成德軍兩使留後
咸通十年十二月以蜀王佶為開府儀同三司劍南西
川節度副大使知節度事以盧耽知西川事
乾符四年正月以壽王傑為開府儀同三司幽州經略
盧龍軍節度副大使知節度事以李可舉知幽州兵馬
事

宰相遙領節度使

開元十六年十一月兵部尚書河西節度副大使知節
度事蕭嵩除同中書門下平章事節度如故宰相遙領
節度使自茲始也至二十六年二月中書令李林甫遙
領隴右節度天寶十載十一月楊國忠又遙領劍南節
度蕭嵩以牛仙客為留後李林甫以杜希望為留後楊
國忠以崔圓為留後

諸使雜錄上 奏薦

貞觀元年四月發諸道簡點使

咸亨三年十二月頒下簡點格其年五月十一日勅中

書門下兩省供奉官及尚書省御史臺現任郎官御史自今已後諸使不得奏請任使永爲常式

二年三月十一日關內道覆囚使邵師德等奉辭上謂曰州縣諸囚未斷甚廢田作今遣爾等往省之非遣殺之無濫刑也至開元十年十月宇文融除殿中侍御史充覆囚使

儀鳳二年十二月二十七日詔宜令關內河東簡練有膂力雄果者卽以猛士爲名章懷太子李元昌等三年正月二十五日遣左金吾將軍曹懷舜李知十等

分往河南河北以募猛士

萬歲通天元年九月令山東近境州置武騎團兵至聖歷元年臘月二十五日河南河北置武騎團以備默啜每一百五十戶共出兵十五人馬一匹

先天二年正月十五日詔往者計戶充兵使二十二入募六十出軍旣憚劬勞咸欲逃匿不有釐革將何致理天下衛士取年二十五已上充十五年放出頻經征鎮者十年放出自今已後羽林飛騎先于衛士中簡擇長壽三年正月詔諸州大都督及上州刺史大都督府

長史諸軍經略鎮守大使一子為宿衛官

開元十年六月七日勅支度營田若一使專知宜同為

一額共置判官兩人

十一年二月二十九日勅同華兩州精兵所出地資輦

穀不合外支自今已後更不得取同華兵防秋容其休

息

二十一年正月二十四日勅令百寮尋勝因置檢校尋

勝使以厚其事

天寶七載十一月給事中楊釗充九成宮使

其使及木炭使並是

岐州刺史勾當至是釗欲移奪大權遂兼監倉司農出納錢物召募劍南健兒兩京太倉含嘉倉出納召募河西隴右健兒催諸道租庸等使

蘇氏駁曰九寺三監東宮三寺十二衛及京兆河南

府是王者之有司各勤所守以奉職事尚書准舊章

立程度以頒之御史臺按格令採姦濫以繩之中書

門下立百司之體要察羣吏之能否善績著而必進

敗德聞而且貶政有恆而易為守事歸本而難以失

夫經遠之理捨此奚據洎姦臣廣言利以邀恩多立

使以示寵剋小民以厚斂張虛數以獻忱上心蕩而

唐會要 卷之八十一
益奢人怨結而成禍使天子有司守其位而無其事
受厚祿而虛其用宇文融首倡其端楊鉷繼遵其軌
楊國忠終成其亂仲尼云寧有盜臣而不畜聚斂之
臣誠哉是言也前車旣覆後轍不改欲求化本不亦
難乎

十二載十二月二十二日左相陳希烈充秘書省圖書
使
十四載十一月安祿山叛命諸州當賊衝者始置防禦
使至寶應元年五月十九日停諸州防禦使

乾元二年七月九日勅宜令御史大夫充曠騎使令御
史充判官

廣德二年九月以太子詹事李峴爲江南東西及福建
等道知選事并勸農宣慰使

大厯十二年五月十日中午書門下狀奏諸州團練守捉
使請一切並停其刺史自有持節諸軍旅司馬卽同副
使之任其判司旣帶參軍事望令司兵判兵馬按司倉
判軍糧按司事判甲仗案具兵士量險隘召募謂之健
兒給春冬衣并家口糧當上百姓名曰團練春秋歸冬

夏追集日給一身糧及醬菜其月十一日諸道先置上都郵務名留後使宜令並改爲上都進奏院官十三日諸道觀察都團練使判官各置一人支使一人推官一人餘並停

十四年二月四日勅准諸道上都知進奏院官自今已後並不須與正官

六月一日勅郎官御史充使絕本司務者宜改與檢校及內供奉裏行其月三日勅御史中丞董晉中書舍人薛蕃給事中劉迺宜充三司使仍取右金吾廳一所充

使院并於西朝堂置幕屋收詞訟

至建中二年十月停後不常置有大獄卽

命丞刑部侍郎大理卿鞠之謂之大三司使又以刑部員外郎御史大理寺官爲之以決疑獄謂之三司使皆事畢日罷

建中元年四月一日門下侍郎楊炎充刪定格式使五月刑部侍郎蔣況充副使二年七月中書侍郎張鎰與盧杞同充格式使其月二十三日旨令刑部長官兼知其使停

建中二年正月二十五日潭開宜依舊置防禦使二月十八日卻置京畿觀察使以御史袁高充使

唐會要 卷之十一
三年九月九日御史中丞楊瑱奏見任官或被諸司不
奏便移文牒充判官伏請自今已後應見任州縣正官
不承制勅差補不得輒離任勅旨依焉

貞元三年三月二十三日勅杜亞宜兼充管內營田使
其楚州營田使宜停

四年二月勅諸道幕府判官及諸軍將比奏改官例多
超越應從散秩入清望官並折資處分

十三年六月加劔南西山運糧使檢校戶部員外郎韋
肇兼御史大夫員外兼大
夫新例

十四年六月罷宣歙池三州鄂岳沔三州都團練觀察
使陝虢兩州都防禦觀察使以其地分隸諸道置東畿
觀察以留臺御史中丞爲之

十六年十二月勅諸道觀察都團練防禦及支度營田
經略招討等使應奏副使行軍判官支使參謀掌書記
推官巡官請改轉臺省官宜三週年以上與改轉其緣
軍務急切事跡殊常卽奏聽進止

元和二年正月鄂岳等州觀察使呂元膺奏新妹壻京
兆府咸陽尉馬縫授試大理評事充京兆觀察支度使

唐會要 卷之八
爲憲司所劾密親佐幕有虧典法勅諸使府參佐檢校
釋元膺之罪時咸非之

七年七月勅諸使府參佐檢校應試官月日計如是五
品已上官及臺省官經三十箇月外任奏與改轉餘官
經三十六個月奏改如經考試有事故及停替官本限
之外更加十個月卽往申奏從之

十三年二月浙東觀察使孟簡授代詔書到日援故事
署留後而行及常州堂牒勒還舊鎮待割使事而後行
初李修授浙西觀察使中謝日請留所替以待交割使

事至是因舉爲例非舊制也

其年七月上藉錢穀吏以集財賦以宣歙觀察使王遂

爲淄青四面行營諸軍糧料使

其年九月詔諸道新授節度觀察經略等使自勅出後
使未到以前或前使尙在本鎮或已發差知留務軍等
官其軍府職員多停省改易自今已後切令禁止縱先
有此色新使道到並令仍舊

十四年二月詔諸道節度使團練都防禦經略等使所
管支郡除本軍州外別置鎮遏守捉兵馬者並合屬刺

史等如刺史帶本州團練防禦鎮遏等使其兵馬額便
隸此使如無別使即屬軍事其有邊于溪洞接連蕃蠻
之處特建城鎮不關州郡者即不在此限

自艱難以來
天下有軍諸

將之權尤重至是遂
分屬於所管州郡焉

其年山南東道觀察使孟簡舉均州鄖鄉縣鎮遏兵馬

佳趙潔充本縣令有紊條章罰一月俸料

其年四月命中官五人為京西和糴使諫議大夫鄭覃

右補闕高武等同以疏論上覽之即日罷其使

其年八月以內侍省姚文壽充京西京兆行營宣慰計

會使六月制以左金吾衛大將軍胡証充京西京北巡

邊使所經過州鎮與節度防禦使刺史審量利害具事

實聞奏因程异之請也七月罷晉州防禦使八月浙東

觀察使薛戎奏准勅諸道所管支郡別置鎮遏守捉兵

馬者宜並屬刺史其邊于溪洞接連蠻夷之處特建城

鎮者則不在此限今當道望海鎮去明州七十餘里俯

臨大海東與新羅日本諸蕃接界請據文不屬明州許

之

十五年十二月中書門下奏內外六品已下正員官諸

唐會要 卷一百一十八
道諸使奏充掌職比限兩考及授官經二年已上方許
奏請卽與依資改轉有才在下位者不免留滯請今後
諸道諸使應奏請正員官充職掌經一週年卽與依資
改轉未一周年與同類試官從之舊制使府判官二周
年始許改轉通計三
考謂之得資與同類試官
今不依舊典物議非之
長慶三年三月勅諸道軍府大將帶監察已上官者三
周年與改轉如是加勅合非時與改者不在此限其大
將未曾奏官者卽亦仰奏焉

四年二月勅諸道節度使去任日宜准元和十五年七

月十五日勅處分其交割狀限新人到任後一個月內
分析聞奏并報中書門下據替限委中書門下據報狀
磨勘聞奏以憑殿最

寶曆元年十二月江西觀察使殷侗奏管內州縣官大
半勾當留在京師職掌當道兩稅外又度支米穀見在
官爲送納者今請下有司留放五員從之仍勅諸道准
此

三年七月勅諸道進奏官等舊例多是本道差文武職掌官充自後遂有奏帶正官者近日又有請兼檢校官及憲官者遞相援引轉無章程自今已後更有奏請帶正官不得兼檢校官及憲官如準諸道諸軍諸使職掌官例請檢校官及兼憲官充則不得帶正員官其見在進奏官已有檢校官兼憲官者且聽仍舊至改轉時商量處分

其年十二月中書門下奏伏准五月八日勅節文諸道諸使奏判官所奏雖官資相當並請限曾任正官經六考以上者比擬監察侍御史九考以上者與比擬殿中侍御史以上節級各加三考如曾諸色登科超資授官者不得在此限所奏憲官特置考限以防僥倖深合至公然節文之中或有未盡臣等再四商量如京六品以上清資官并兩府判官及進士出身平判入等諸色登科授官人不在此限其在使府及監察已上者亦任準元和七年八月二十二日勅節文依月限處分餘望准前勅施行依奏

四年四月中書門下奏自元年以來頻有討伐諸道薦

唐會要 卷七十九
送軍將其數漸多臣等商量應諸道軍將官至常侍大夫職兼知兵馬使都押衙功績顯著本道官職可獎者卽任薦送其餘官職未高才能可錄所在軍鎮合驅使自今後軍官未至常侍大夫職兼都虞候都知兵馬使都押衙者不在薦送限但仰本道節度使看其功績顯著與改轉職已至高者檢校官兼官宜與奏改如有功績殊異允合不次超擢者卽任別具事跡聞奏亦不在便薦送限又應諸方鎮或因移易停罷其使隨從元從軍將只合本道量才驅使不情願住者一任東西不合

更來朝廷別求僥倖勅旨依奏

其年五月勅置疎決囚徒使以清強御史二人爲之應京城諸司見禁囚徒宜令疎決處分具輕重聞奏

其月勅陝虢西去兩京非遠唯管一郡分置廉使本因艱難若四方少事則舊制爲便其都防禦觀察使額宜停所管兵馬使屬本州防禦使

五年十月勅樓煩監牧及造水等使宜共置判官一員巡官一員

六年十二月勅隴州防禦使宜準長慶二年九月十八

唐會要 卷七十九
三
日勅例置判官一員其兵馬留後判官勒停
九年五月中書門下奏準太和七年七月十四日勅諸
道進奏官令揀擇清慎人充非因過犯不得停罷如方
鎮自要腹心委寄任於本道差見任官充又準太和元
年九月十九日勅不許授別官今日以後並請準元和
勅處分如邊上無俸料處只得授近處官亦不得占江
淮好闕其新進奏官仍須守職二年後無敗闕方得奏
官勅旨依奏

其年十二月左僕射合諸道奏諸節使新授具巾抹帶

器仗省中參辭兵部尚書侍郎者伏以軍國異容古今
定制苟不由舊務祈改常未聞省閣之門忽入弓刀之
器伏請停罷如須參謝任具公服到本州縣後交割兵
馬詣實申奏從之

開成元年十一月中書門下奏準太和十一年七月二
十六日勅諸道節度使下都押衙都虞候約五年以上
方得改轉押衙兵馬使約七年以上方得改轉三萬人
以上軍兵每年許奏四人其序遷合與憲官者以曾歷
兩任奏授賓詹者與監察以次遷序止於侍御史其御

唐會要 卷七十九
史中丞以上官並須因有戰功方得奏請諸道團練下
萬人以上軍所奏不得過殿中侍御史如未有憲官者
不在奏限萬人以下軍不因戰功並不得奏論請勅旨
依奏

二年十二月中書門下奉諸道節度使觀察都團練使
請朝官任使準貞元二年勅中書門下有供奉官及尙
書省御史臺見任郎官御史諸司諸使並不得奏請任
使伏以周之列國咸有命卿漢代諸侯皆建傅相蓋以
崇重五爵施之寵榮賈生爲傅於長沙管仲讓王之上

禮出其廷彥且命爲卿經史垂文古制斯在況貞元之
初戎鎮之事比於今日頗謂不同聖朝授任推公惟才
是急輟諸上選分佐戎行職則稍尊命則稍重而又才
人涉歷練達武經出入往來便堪獎用是朝廷之所利
誠方鎮之得人希古濟今匪宜專恣酌于臨事可否在
茲臣等商量諸節度觀察都團練使朝中素有相知者
許奏一人充副使章服準太和三年五月八日勅如素
無相知不奏亦聽其方鎮帶相及自廟堂平章事出鎮
者任約舊例奏署庶使藩方益重試任程才其今日以

唐會要 卷七十九 五
前應奏署勅已行者雖關前勅人數至少式遵成命又
難追移伏請自此已後不得違越勅旨依奏
三年四月中書門下奏宰相帶平章事出鎮應朝官充
使府職事任約舊例奏署使藩方益事委任程才謹詳
勅文意在明許亦不定言人數及所請職名臣等商量
起今以後宰相自朝廷出鎮奏請朝官及刺史佐幕前
後更五人數內有遷轉停罷者或須填替任更奏來如
或辟用他官不奏亦得官至侍御史以上者卽許奏章
服便爲常例庶可通行勅旨依奏

四年六月中書門下奏諸道節度使參佐自副使至巡
官共七員觀察使從事又在數內雖大藩雄鎮有藉才
能而邊鄙遐方豈易供給況行軍之號本繫出師參謀
之職尤是冗長其行軍司馬及參謀望勒停省見任人
如本道有相當職員任奏請改轉其餘官序稍高者許
隨表赴京到日量才獎授郎御史以下各令冬薦節度
判官舊額雖本兩員近日諸道亦不盡置起今已後望
以一員爲定其課科等本是供軍數內戶部不可更收
勅旨依奏

其年七月勅諸道奏入仕人數轉多每年吏曹注擬無闕唯河北諸道河東澤潞劍南三川京北京西管內官員數多假攝之中實有勞効每年許奏三兩人仍須是元額闕不得替見任人其餘並不得奏入

會昌三年四月勅諸道節度使觀察使授後發期宜令不得過十日

其年五月勅比來節將移改隨從將校過多非唯妨奪舊人職員兼亦費用軍資錢物節度使移鎮軍將至隨身不得六十人觀察使四十人經略都護等三十人宜

委監察軍使及知留後判官具名聞奏如違此數知留後判官量加懲罰監軍使別有處分自今以後節度使等如罷鎮赴闕應將官吏將健隨赴上都者並隨使停解縱有帶憲官充職亦勒停其間或有是功勳重臣舊將校人數稍多者離鎮後新停解即須具人數聞奏當與量事宜處分

四年二月御史臺奏準會昌三年十一月十三日勅諸道進奏官或有一人兼知四五道奏進兼並貨殖頗是倖門因緣交通爲弊日甚向後兼知不得過兩道以上

者各委本道速差替聞奏仍委臺司糾察如有違犯必議重懲又兼知三四道者臺司檢勘各牒本道準勅差替訖切慮改名補職不離一家元是本身虛立名姓伏請從今已後如知兩道奏進外一家之內父子兄弟更不得知諸道奏進如有違犯臺司準前察訪勅旨依奏五年六月勅諸道所奏幕府及州縣官近日多鄉貢進士奏請此事已曾釐革不合因循且無出身何名入仕自今以後不得更許如此仍永爲定例

其年九月中書門下奏條流諸道判官員額西川本有

十二員望留八員節度副使判官掌書記觀察判官支使推官雲南判官巡官淮南河東舊額各除向前職額外淮南留營田判官河東留留守判官幽州淄青舊各有九員望各留七員幽州除向前職額外留盧龍軍節度推官淄青除向前職額外留押新羅渤海兩藩巡官山南東道鄭滑河陽京南汴州昭義鎮州易定鄆州魏博滄州陳許徐州兗海鳳翔山南西道東川涇原邠寧河中嶺南已上舊各有八員望各留六員節度副使判官掌書記推官觀察判官支使振武靈夏益州鄜坊舊

唐會要 卷七十九
各有八員緣邊土地貧望各留五員節度副使判官掌書記推官觀察判官浙東浙西宣歙湖南江西鄂岳福建以上舊各有六員望各留五員團練副使判官觀察判官支使推官黔中舊有十員望各留六員經略副使判官招討判官觀察判官度支鹽鐵判官東都留守陝府舊有五員並望不減天德舊有三員亦望不減同州舊有四員商州兩員並望不減防禦副使莘州泗州各有兩員並望不減楚州壽州各有三員壽州望減團練副使一員楚州望減營田巡官一員汝州鹽州隴州舊

各有一員望不減桂管舊有六員望減防禦巡官一員容管舊有五員望減招討巡官一員延州舊有兩員亦望減防禦推官一員樓煩龍陂舊各有兩員望各減巡官一員右奉聖旨令商量減諸道判官約以六員爲額者臣等商量須據舊額多少難於一例停減今據本鎮額量減數亦非少仍望令正職外不得更置攝職仍令御史臺及出使郎官御史專加察訪勅旨依奏
大中二年七月中書門下奏黔中鹽鐵使判官開成中已停減不置臣等商量望黔中置經略推官一員其鹽

唐會要 卷七十九 九
鐵使判官望令依舊額卻置勅旨宜依
其年十月中書門下奏伏以銀青借兼檢校賓客官及
朝散大夫階並三品資歷白身不合虛豎奏官近年諸
司使多虛豎此色頭銜奏請授官求中上州長馬及上
州判司踰濫僥倖莫甚於此臣等商量自今已後諸司
諸使應合奏授正官者並不得虛銜前件官階奏請如
是長不守章程依前論請奏聽進止其諸道差知進奏
官亦望准此處分勅旨依奏

三年三月中書門下奏伏准太和六年六月御史臺奏

本置官員藉其任守吏曹注擬皆是職司況調選須有
出身合年十五以上比及於選入以十年則二十五可
以爲成人矣今則皆稱年小奏請句當所在相承積習
成例若實年小卽不合早補身名若補實當年又何慮
爲官不了合請諸道方鎮子孫應選授及奏授官一切
勒歸本任不得輒有奏留如或恩出殊常賜及一子者
年十三以下卽任奏聽進止奉勅宜依者臣等謹詳勅
前約勒非不丁寔近日不守勅文例皆請奏臣等商量
自今已後諸道節度觀察防禦經略等使如或特降恩

賜制及一子官年十五以下者卽望許奏請句當留除外其餘並望準前勅處分其見在千牛進馬者並準今年三月三日勅處分

其年四月勅如聞朝臣出使外藩皆有遺賂是修敬上之心或少或多號爲人事從前如此率爲常例今邊上受命撫戎類須發使若每使許循舊例則十方竟至困窮如事前不與繩檢又使臣難爲辭拒其出使朝廷邊上一物以上並不得受領卻到京後方鎮亦不得輒寄

附

其年五月勅藩鎮改移見在倉庫錢穀旣已得替便屬新人向前曾有勅文更給留別歲月深久官吏因循苟徇軍情不守朝典自今以後節度觀察使除替改更不在給留別限仍勒知後判官及本曹官典切加檢舉如有違越當重科懲

五年十月中書門下奏伏見諸道及州府如縣令錄事參軍有闕及見任官公事闕敗切要替換卽事各舉所知聞奏及須蒞官曾有課績處已必能清廉如論薦不當舉主先議懲殿其判司參軍文學縣尉丞簿等不奏

限其河東潞府邢寧涇原靈武振武鄜坊滄德易定夏州三川等道或道路懸遠或俸料單微每年選人多不肯受若一例不許則都俸不在給留別限仍勒知後判官不許則都無正官今請前件數道除縣令錄事參軍外其判司尉縣丞簿每年量許奏三員須是元額闕不得替考深人其闕一年吏部不注卽注且差攝二年吏部不注然後許奏請仍資序不得超越如是散試及外身不得奏第二任官其京百司除職事外不在更奏官限勅旨依奏其月勅會昌三年六月八日已有明勅應

文武官除授諸道節度觀察經略防禦使及就加官爵等起今以後與送官告旌節使人事物不得過三千匹爲定制令諸道各有舊例有過三千匹者宜准勅減不得違越

六年十二月中書門下奏應諸道節度使觀察團練使防禦經略等使所請俸料職田祿粟時服雜給並諸色人事用度等先奉聖旨令條流奏來者伏以藩鎮之任寄切分憂一方慘舒繫在長吏近者所在軍府多稱窮空因緣增添費用滋廣不遵往例唯徇人情物力旣困

于公家誅斂終歸于百姓稍能釐革裨益實多置使之
初必有定額歲月深遠或多改更望令諸道帥臣及長
吏各詢訪事例檢尋簿書其間苟踰舊規及有新置並
宜除去務在至公于軍府州鎮經營利綱等項相承既
久併絕則難相害人亦宜禁止奉勅宜依

其月中書門下奏觀察使職當廉問位重藩維受明王
之寵寄同國家之休戚豈可但享崇貴唯務優游羅聲
色以自娛顧凋殘而莫問縱逃顯責必受陰誅自今以
後並請責其成效專其事權使得展意盡心恢張皇化

敬事以守法度節用以減征徭有利于國者必行不以
近名爲慮有害于人者必去不以循例爲辭絕連夜之
酣歌務盡心于議讞常推此道方免曠官其巡屬州縣
須知善惡每歲考校具以上聞隱而不言罪歸廉帥應
有所論薦須直書事績不得虛詞有所舉聞須盡錄奸
賊不得隱漏懦弱不任職者奏免不得徇情清強能立
事者上陳不得蔽善如此卽上下相制遠近相臨同推
至公共成致治勅旨卿等所條流廉問牧宰等事實繫
生靈慘舒並依

咸通九年十二月二十三日勅司農寺丞薛瓊可贊善大夫充滁廬壽州招召鄉兵使

十二年七月中書門下奏諸道節度防禦使下將校奏轉試官及憲衙等每年量許五人都團練防禦使量許三人爲定不得更于其外奏請其兼御史中丞以下卽準勅文條流須有軍功方可授任今後若顯有戰功任其事績申奏檢勘不虛當以處分此外不得更有奏請其幽鎮魏三道卽且准舊例處分

其年中書門下奏准今年六月十二日勅釐革諸道及

在京諸司奏官並請章服事者其諸道奏州縣官司錄錄事參軍縣令或見任公事敗闕不治切要替換及前任實有勞效並見有闕員卽任各舉所知每道奏請不得過兩人其河東潞州府邠寧涇原靈武鹽夏振武天德鄜坊滄德易定三川等道觀察防禦等使及嶺南五管每道每年除令錄外許量奏簿尉及中下州判司縣丞共三人偏州不在奏州縣官限其黔中所奏州縣官及大將管內官卽任準舊例處分在京諸司及諸道帶職奏官或非時充替考限未滿並卻與依資官從之

天祐元年四月勅今後除留宣徽兩院小馬坊豐德庫御廚客省閣門飛龍莊宅九使外餘並停廢其內園冰井公事委河南府句當至二年二月十六日勅只置宣徽院使以權知樞密事王殷充副使以趙殷衡充其樞密使並宣徽南院使並停所司勒歸中書宣徽院人吏不得私出本院與人交通諸道句當事人亦不得到院凡有公事並於中書論請

諡法上

舊制諸職事官三品以上散官二品以上身亡者佐史

錄行狀申考功考功責歷任勘校下太常寺擬諡訖復申考功於都堂集內省官議諡然後奏聞贈官同職事無爵者稱子若蘊德邱園聲實明著雖無官爵亦奏賜諡曰先生也

文按諡法經緯天地曰文道德博原曰文勤學好問曰文慈惠愛民曰文愍民惠禮曰文錫民爵位曰文

贈中書令楚國公上官儀贈兗州都督沛郡公韋叔夏贈兗州都督扶風縣公蘇珣贈衛州刺史清河縣子崔融贈太子少保彭城縣東海縣公徐堅贈太子少保彭城縣公劉知柔贈幽州都督彭城郡公韋湊贈潤州刺

史常山縣公馬懷素贈禮部尚書舒國公褚無量贈益
 州大都督固安縣公盧從愿贈江陵大都督宿預縣公
 王邱贈江陵大都督襄陽縣侯席豫贈禮部尚書賈至
 贈禮部尚書韓愈贈右僕射潘炎贈太尉令狐楚贈左
 僕射權德輿故襄州節度使李翱贈司徒李璣故太子
 少傅白居易大中三年十二月中書侍郎平章事白敏
 中上疏請行諡典從之下太常諡曰文

武克定禍亂曰武威強睿德曰武開土拓贈太尉霍國
 境曰武帥眾以順曰武折衝禦侮曰武

公王思禮贈司徒扶風郡王馬璘太尉李愬博士王彥威請為武

當怙稱奏進止以李愬父諡曰武以有武字諡不合
 同宜令所司重定博士元從實執中請依前諡為武

獻聰明睿哲曰獻惠無內贈太常卿邠陰男薛收贈禮
 德曰獻智質有聖曰獻

部尚書常山郡公元行沖贈秘書監衛密贈太子太傅
 敬括

懿溫柔賢善曰懿愛民質直曰懿
 柔克有光曰懿體和居中曰懿贈并州都督安德郡

公楊師道贈兵部尚書武陽郡公李大亮贈吏部尚書
 永寧郡公王珪贈潤州刺史來恆贈太子少保張文瓘
 贈幽州都督鄭國公楊崇毅贈禮部尚書正平縣公裴
 灌贈禮部尚書源洧贈秘書監姚合贈左散騎常侍趙

復贈揚州都督蕭昕贈御史大夫鄭叔則贈禮部尚書
蔣乂故禮部尚書許康佐故東川節度使馮宿贈左僕
射辛秘贈左僕射馬總

宣聖善周聞曰宣施而不贈太傅盛王倚贈太子太師

漢中郡王瑀贈幽州都督廣平郡公劉祥道贈國子祭

酒趙宏智贈太尉魏王武承嗣贈太尉梁王武三思贈

吏部尚書王延昌贈太子少保鮑防贈尚書左僕射歸

崇敬贈兵部尚書陸贄贈工部尚書薛平贈右僕射鄭

澣

昭聖文周達曰昭贈侍中中書令并州都督固安郡公

崔敦禮特進金城郡公李珍贈幽州都督趙國公李湛

荆州大都督舒國公韋巨源景雲元年太常寺諡巨源

曰三思引之為相阿韋託之為親無功而封無德而祿

同族則醜正安石他人則附邪楚客諡之曰昭良恐未

當博士李處直固請依前諡為定邕又駁曰夫古之諡

議在乎勸沮將杜小人之業冀長君子之風故為善者

雖存不貴仕而歿有餘名此賢達所以砥節也為惡者

雖生有所幸而乃死有所懲此回邪所以易心也嗚呼巨

源曾未斯察而乃聞義不從與惡相濟蓄罔上之志叶

羣凶之謀苟容聖朝貪味享祿自以宰臣之貴不崇朝

而賈害者固鬼得而誅之也彼則匹夫之微未受命而

行刑者固人得而誅之也幽明之慎斷焉可知天地之

心自此而見今乃妄加褒述安能贈吏部尚書齊國公

分謗者哉雖有此議竟諡為昭

崔日用贈戶部尚書韋元甫贈刑部尚書兼御史中丞
李澄贈太師崔儆贈司空李復贈司空鄭綱贈司徒趙

宗儒

元始建國都曰元行義悅民曰元能思辨眾曰元贈司
主義行德曰元忠肅恭懿曰元宣慈惠和曰元贈司

空河間郡王孝恭贈并州都督畢國公阿史那社爾文

昌右相扶陽郡公韋待價贈司空芮國公豆盧欽望贈

秘書監朱敬則贈鄴郡太守趙良器贈尚書左僕射東

海郡公于休烈黃門侍郎崔渙贈太子太傅李涵贈工

部尚書李建贈太保柳公綽

節好廉自克曰節贈司空鄖國公殷開山贈工部尚書
巧而好度曰節贈司空鄖國公殷開山贈工部尚書

范陽郡公張道源贈冬官尚書平昌縣男高叡贈工部

尚書馮昭泰贈尚書左僕射裴玢

景者意大慮曰景布義行
剛曰景由義而濟曰景贈禮部尚書黎國公温大雅

贈幽州都督潞國公薛萬均邠王傅固安縣侯盧粲贈

荊州大都督嗣虢王邕贈黃門監魏縣男畢構贈特進

嗣寧王琳故忠武軍節度使郗士美贈太保劉濬贈工

部尚書馮定

成安民立政曰成贈司空萊國公杜如晦贈揚州大都
刑人克服曰成贈司空萊國公杜如晦贈揚州大都

督河間郡公李義府贈越州都督吳興縣伯姚璿贈侍
 中平鄉縣公李懷遠贈大理卿平安縣伯崔昇贈戶部
 尚書真源縣子李璿贈荊州大都督崔翹贈河南尹博
 陵縣公崔希逸國子祭酒韓洄贈尚書右僕射嗣曹王
 皋贈工部尚書郭隆贈戶部尚書齊抗贈陝州大都督
 崔宗贈尚書右僕射吳湊贈揚州大都督趙昌故京兆
 尹李充贈工部尚書裴次元贈太尉李逢吉贈禮部尚
 書張仲方故洪州觀察使王仲舒
 烈秉德尊業曰烈贈左衛大將軍永安郡公王孝恭贈
 安民有功曰烈

右衛將軍平原郡公程務挺贈并州大都督梁國公契
 苾何力贈輔國大將軍原國公田歸道贈太子少傅韋
 光乘贈禮部尚書張孚贈尚書左僕射孫志直贈尚書
 右僕射韋謙光贈司空張獻甫贈鴻臚卿司馬逸客贈
 故東臺侍郎同東西臺三品荊州大都督府長史李安
 期

孝秉德不回曰孝慈惠愛親曰孝協時肇享曰孝五宗
 安之曰孝從命不忿曰孝幾諫不倦曰孝善事父母
 曰孝親睦其黨曰孝慈愛忘勞曰孝贈司徒道王元慶贈
 孝博於備物曰孝尊仁安義曰孝開府儀同三司觀國公楊恭仁贈戶部尚書裴守忠贈

唐會要 卷七十九
兵部尚書逍遙公韋嗣立贈禮部尚書崔沔贈岐王府
長史裴子餘贈魯郡都督趙郡公李瑱贈太子太傅郭
曜贈禮部尚書鄭杲贈工部尚書韋溫贈吏部尚書李
景讓

康溫柔好樂曰康安樂撫贈司徒鄧王元裕贈太子左

庶子安平縣侯李百藥贈太常卿豐城縣男姚思廉贈

太常卿陽翟縣侯褚亮贈吏部尚書大安縣公閻立德

贈原州都督嘉興縣子陸敦信贈禮部尚書新野縣公

張俊贈兵部尚書潘孟陽贈吏部尚書并州都督楊師

道

定大慮靜民曰定安民法古曰定追補前贈司徒應國

公武士彥贈荊州大都督吳興縣公沈叔安贈并州大

都督芮國公豆盧寬贈幽州都督燕國公子志寧贈秦

州都督高都郡公李緯贈幽州都督范陽郡公盧承慶

贈洛州長史裴懷節贈并州都督北平縣公張行成贈

越州都督高智周贈隴州刺史會稽郡公于德方梓州

刺史李震贈太子少師徐浩贈太傅何進滔贈左散騎

常侍王質

穆布德執義曰穆贈同州刺史蘭陵縣公蕭德昭幽州

刺史韋知貞贈禮部尚書唐昭故閩州刺史顏防贈戶

部尚書潞州都督郟昂贈少保裴向貶授開州司馬宋

申錫會昌三年五月起復官爵追賜諡焉

貞大慮克就曰貞外內用情曰貞清白守節曰貞圖國忘死曰貞內外無懷曰貞直道不撓曰貞贈司

徒密王元曉贈開府儀同三司新昌郡公李綱贈太子

少保潁川郡公韓仲良贈幽州都督清邱縣公崔義元

贈洪州都督博陵縣子閻立本贈秦州都督武陽縣公

韋琨贈右驍衛將軍河間郡公孝友贈吏部尚書石泉

縣公王方慶贈幽州都督魏縣男崔神慶贈益州大都

督邢國公王及善贈涼州大都督譙縣子婁師德贈并

州大都督齊國公魏元忠贈天官尚書楊執柔贈太子

少傅武陽縣伯韋抗贈尚書左丞相廣平郡公程行誼

開元十四年諡曰貞岐王府長史裴子餘諡曰孝同時列上中書令張說省之曰程裴二諡可謂諡之無愧者

贈黃門監中山郡公李父贈吏部尚書金城縣伯李朝

隱贈江陵大都督高邑縣伯李尚隱贈揚州大都督南

皮郡子韋虛心贈戶部尚書楊瑒贈潞州大都督源復

御史大夫崔器故國子祭酒贈秘書監楊瑒贈右散騎

常侍韋常陝州大都督劉滋贈右僕射姚南仲贈太子
 太保高郢贈禮部尚書盧坦贈太子少保裴均太子太
 保鄭餘慶贈故潤州節度使路隨贈右僕射錢徽贈兵
 部尚書孔戣贈右僕射李造贈司徒李絳贈太保韓皋
 贈司徒崔從贈司空王徽贈司空崔慎由贈戶部尚書
 韋澳故工部尚書裴佖

簡 壹德不懈曰簡平易不
 善曰簡理典不殺曰簡贈幽州都督沛國公鄭元璠

洪州都督平昌縣侯于貴寧贈秦州都督汾陰縣公薛
 愿贈幽州大都督平恩縣公許圜師贈太常卿魏縣子

盧承業贈黃門監天水郡公尹思貞平陽郡太守柳渙

杭州刺史杜濟贈陝州大都督張式贈左僕射韋夏卿

故洪州觀察使薛放故桂州觀察使嚴謨

平布網治紀曰平執事有制曰平治
 而無眚曰平附不黨疏不遺曰平贈右衛將軍黎國

公裴行方贈蒲州刺史李素立贈太子太保徐申贈左

散騎常侍顏証

安好和不爭曰安
 寬容平和曰安贈司徒江王元祥贈禮部尚書鄧國

公竇璡太保梁郡公蕭造贈工部尚書莘國公竇誕贈

涼州都督廣德郡公李安遠贈岷州都督長道縣公姜

暮贈工部尚書紀國公段綸贈并州都督樂壽縣男長孫操

懷慈仁短折曰懷贈衛王元霸

惠愛民好與曰惠柔質慈贈司徒鄭王元懿贈侍中趙

郡公李景伯太子右諭德梁郡公孔若思贈洪州刺史

崔戎

德綏柔士民曰德忠和純備曰德強直溫柔曰德勤恤

德民隱曰德富貴好禮曰德忠誠上實曰德輔世長民

德剛塞簡廉曰德贈禮部尚書河南王贄贈靈州都督

夷國公李子和亳州刺史魏王武元爽贈司空李麟贈

太師杜審權贈吏部尚書崔郾

忠危身奉上曰忠危身惠上曰忠讓賢盡誠曰忠危身

忠贈國曰忠慮國忘家曰忠盛衰純固曰忠臨患不反

忠日忠安居不念日忠贈左衛大將軍淮陽郡王道元贈禮

部尚書嗣魯王道堅贈司空蔣國公屈突通贈戶部尚

書江國公陳叔達贈秦州都督開化郡公趙茲景贈左

驍衛大將軍新興郡公馬三寶贈刑部尚書清河縣公

崔善為贈尚書右僕射道國公戴胄金紫光祿大夫武

昌縣公靳孝謨贈尚書右僕射高唐縣公馬周贈幽州

都督河清郡公房仁裕贈太子少師來恆贈幽州大都

督崔知温贈荊州大都督宋國公唐休璟贈蘄州刺史
 許欽寂贈開府儀同三司魯王武崇訓贈幽州都督梁
 國公魏知古岐王傅宏農縣公楊温玉贈司空李德裕
 贈戶部尚書淮安郡國公李琇贈益州大都督清河郡
 公崔隱甫贈太尉賈循贈揚州大都督樂子昂贈太子
 太傅吳淑贈尚書左僕射孔巢父贈吏部尚書崔縱故
 秘書監裴清贈禮部尚書蔣清贈太尉李光顏
 靖秉德安眾曰靖寬樂令終曰靖恭已鮮言曰靖贈司空淮安王神通贈太子
 太保長平郡王叔良贈尚書右僕射延安郡公竇威魏

州刺史辛君昌鴻臚卿懷仁縣公郭嗣本贈越州都督
 渭源縣侯顧琮贈太子太師冀國公竇希瓘贈左散騎
 常侍路嗣恭贈太子太傅崔損
 質名實不爽曰質章義掩贈蘭州都督清河郡公楊宏
 禮贈太子少傅魏縣子崔神慶
 戴典禮不愆曰戴愛民好治曰戴贈祕書監瑯琊縣子顏師古
 憲博聞多能曰憲聖善周達曰憲贈國子祭酒彭城縣公令狐德棻贈
 廣州都督江陵縣子岑文本國子祭酒曲阜縣子孔穎
 達贈司徒菴縣公高季輔贈太尉聞喜縣公裴行儉汾

州刺史贈梁王武元慶常州刺史獨孤及贈禮部尚書

皇甫政贈太子少保歸登贈禮部尚書張薦太子少保

許孟容贈右僕射王彥威

威強毅執正曰威猛以強贈涼州都督懷縣公于伯億

贈戶部尚書田仁會贈涼州都督太原郡公郭知運

員外郎崔厚駁之曰郭知運承恩詔葬向五十餘年今

請易名竊謂非禮謹案禮經云禮時為大又曰過時不

及為禮也昔衛公叔文子卒將葬其子戊請諡於君曰

今日知運既名不浮行數紀之前門生故吏已合謀諡今

乃申請竊將有為而為其子英父頃屬多故屢制方隅

朝廷策勳位崇端揆附從者百輩若率而行之誰曰無請

況今裂土者接軫專征者百輩若率而行之誰曰無請

不惟有司疲於簡牘抑恐名器等於草芥雖欲曲全竊

將不可又禮經云已孤暴貴不為父作諡若知運合諡

而先君其時則嗣子廢先君之德若不合諡而苟遂其

志則先君因嗣子而見尊以僕射而言既詒越禮之謂

孤及議曰禮時為大順次之將葬易名時也有故闕禮

追遠請諡順也公叔戊請諡適當葬前謹案三百禮經

三千威儀會不言已葬則不可追諡況帝王殊途不相

沿襲新制禮則死必有諡不云日月有時今請易名者

五家無非葬後苗太師一年矣呂諶四年矣盧奕五年

矣顏杲卿八年矣並荷褒寵無異同之論獨知運不幸

遂以過時見抑苟必以已葬未葬為節則八年與五十

年其後一作諡此謂其父無位而子居貴位不當以已之

不為父作諡若知運者處方面重寄列位九卿茂勳崇

貴加榮於父飾終之禮宜加於他將一等豈待因嗣子

名與衛霍侔飾終之禮宜加於他將一等豈待因嗣子

然後作諡今之專征者率多起屠販卑隸之中雖逢風

雲化為侯王而其間祖父爵位與知運等當請諡有幾

何乃懼名器等於草芥以是廢禮竊謂近誣 贈揚州大

都督鄴國公崔光遠贈司空嚴礪贈潞州大都督劉昌

裔

剛強毅果贈右武衛大將軍永安郡公姜寶誼贈左武

衛大將軍戴國公左難當

肅剛德克就日肅贈左衛大將軍長平王叔良贈益州

大都督鄧國公竇軌贈民部尚書信都男竇靜始州刺

史襄武郡公劉師立侍中齊國公敬暉禮部尚書孟禮

溫贈工部尚書呂誼太常議諡曰恭度支員外郎嚴郢

日在台司觀斷無匪躬之能者乃搜瑕掩德非中道之
言也國家故事宰臣之諡皆有二字以彰善旌德焉夫
呂公文能無害武能禁暴貞則幹事忠則利人盛烈宏
規不可備舉傳敘入元之德曰忠肅恭懿若以美諡擬
於形容請諡呂公忠肅博士獨孤及議曰秦符必加諡
二字具以忠配肅謹案舊議凡沒考之故吏得可以行狀
請諡於尚書省而考行定諡則有司存朝廷辨可否宜
在眾議今駁議撰諡異同之說並故吏專之伏恐亂庖
人尸祝之分違公器不私之誠且非唐虞師錫僉曰之
道諡法在懲惡勸善不在字多必稱其大而略其細故
言文不言武言武不言文三代已下朴散禮壞乃有二
字之諡非古也其源生於哀周漢蕭何張良霍去病霍
光俱以文大略佐漢致太平其業不一謂一文不足
以紀其善遂有文忠文武景桓宣成之諡雖贖禮甚矣
然猶褒不失人唐與參用周秦之制以魏徵為文貞蕭
瑀為貞稱其杜如晦封德彝陳叔達溫彥博岑文本唐
休璟魏知古崔日用並當時赫赫以功名居宰相諡之
不過一字不聞子孫佐吏有字少稱屈由此言之二字

不必為褒一字不必為貶若褒貶果在字數則堯舜禹湯文武成康不如周威烈慎靚也齊桓晉文不如趙武靈魏安釐也杜如晦王珪已下或成或明或懿或憲不
 如蕭瑀之貞福也然肅者盛德克就之名足以表之矣
 以諍之從政威能閉邪德可濟眾故以肅易名而忠在
 其中矣亦猶隨會甯俞之不稱文豈必因而重之然後
 為美魏晉以賈詡之籌策賈逵之忠壯張既之政能程
 昱之智勇顧雍之密重王渾之器量劉惔之鑒裁庾翼
 之志略彼八君子者方之東平宜無慙德身死之日並
 諡曰肅當代不以為貶何嘗徵一字二字為之升降乎
 上稽前典下據甲令參之禮經而究其往事請依前諡曰肅
 贈戶部尚書柏貞節台
 州刺史崔詔贈右僕射李巽贈太子太保李鄘贈太子
 少傅杜亞贈太子少保崔俊贈司徒韓充
 壯威德剛武曰壯勝敵志強曰壯死於原野曰壯好力致勇曰壯履行征伐曰壯武而不遂曰壯敵國克服

壯曰贈廣州都督建寧縣公龐孝恭贈幽州都督瑯琊郡
 公牛進達贈麟州總管鄜城郡公梁禮贈荊州都督東
 萊郡公孫武達贈梁州都督順義郡公雲師端贈右武
 衛大將軍新城縣侯楊胄贈原州都督博陵郡公賀蘭
 整贈潤州刺史尹元貞贈右衛將軍王文慶贈涼州都
 督元禮臣
 恭尊賢貴義曰恭愛民長悌曰恭既過能贈司空襄邑
 郡王神符贈荊州都督隴西郡王博父贈太尉濮王泰
 贈左衛大將軍北平王阿史那鉢苾贈特進虞國公溫

彥博禮部尚書魏郡公晉文衍贈揚州大都督高陽郡

公許敬宗太常定諡博士袁思古議曰敬宗位以才昇

歷居清級然棄長子於荒微嫁少女於夷落

聞詩學禮事絕於趨庭納采問名惟聞於贖貨白珪斯

玷有累清塵易名之典須憑實行按諡法名與實爽曰

繆請諡為繆敬宗孫太子舍人彥伯訟稱思古與許氏

先有嫌怨請改諡博士王福時議曰諡者飾終之稱也

得失一朝榮辱千載若使嫌隙是實即合據法推繩如

其不然未虧直道義不可奪官不可侵二三其德何以

言禮請依思古議為定戶部尚書戴至德謂福時曰高

陽公任過如此何以定諡為繆答曰昔晉司空何曾既

忠直且孝徒以日食萬錢所以貶為繆况敬宗不及

於曾飲食男女之累有逾於曾而定諡為繆無負於許

氏矣詔令尚書省集五品以上重議禮部尚書

楊思敬議稱按諡法既過能改曰恭請諡曰恭

蘇氏駁曰宇文士及初諡為繆以在家侈縱劉洎駁

之竟諡為縱許敬宗初諡為繆以干國邪佞楊思敬

改之反諡為恭是非在於當時名實豈憑至行嗚呼

思敬青於藍矣

贈汴州刺史楊宏武贈幽州都督鉅鹿郡公竇德元荆

州大都督府長史薛大鼎贈并州大都督道國公戴至

德贈潭州都督外黃縣男薛景山贈并州都督鄭國公

楊再思贈幽州都督龐承宗贈司空李揆太子賓客盧

綸贈揚州都督張伯儀贈太子少保嗣吳王璣贈吏部

尚書韋武贈尚書左僕射程昇贈陝州大都督高固贈

